

空同诗集



內
時

周
鑿

光緒己丑
九月渭南
氏棊子
冬十月
枝補

序

文命乎率由舊章效法於前賢之學也今茲精尚一國之

弘治中敬皇帝右文上儒彬彬興治於時君臣恭和海內
熙洽四夷卽敘兆眈允殖輶軒無靡及之歎省寺茂鞅掌
之悲由是學士大夫職思靡艱惟文是娛不榮躍馬之勳
各競摻觚之業可謂太平有象千載一時矣時則有若空
同李子獻吉以恢闕統辯之才成沉博偉麗之文厥思超
立厥調寡和游精於秦漢割正於六朝執符於雅謨參變
於諸子以柔澹爲上乘以沉著爲三昧以雄渾爲堂奧以
蘊藉爲神樞會詮往古之典用成一家之言巨者日融小
者星列長者江流濶者海受洋洋巖巖冥冥燿燿無所不

極後有知言之選歎賞不暇尙安能爲之昂抑哉遂能掩蔽前賢命令當世秦漢以來寡見其儔矣唐杜子美詞人之雄也元稹稱其薄風雅吞曹劉奄顏謝兼昔人之所獨專今其集具在雖稱大家要自成已格爾乃若風雅曹劉顏謝之調有無哉固知元氏子溢言矣其視空同規治古調無所不極當何以云或有言之古人順意靡刻空同則志飾古辭疏朗達意空同則援精浚川子曰非然哉厥睹誤矣大觀迤炤雖經墳子史判不相能以各發舒其華也揆道述政雖堯舜三王靡所總攝以各際會其變也況茲以文命乎率由嗜好成於性質安能古今擬議同一區畛

卽云空同子調亦無不可矣空同子往與余論文云學其
似不至矣所謂法上而僅中也過則至且超矣子獨不聞
喬白巖登華山乎至華坪道士曰諸登者此止矣喬瞪目
而起窮探嶮涉不但已已遂得摩蓮峰捫華掌下視方夏
爲睚中物昌黎子攬索岷岷卽悲號恐矣彼安得知華嗟
乎空同子之爲文豈易易言乎哉鳳陽守曹君仲禮空同
甥也以余於舅氏爲知友刻其集而請序浚川子曰空同
爲人氣高節挺孤立峻視不能少縮下阿依貴人又如鳳
矯龍變人罔不知其爲祥亦罔不駭其異故再罹顛蹶卒
不能起而大受匪無容之無深知之匪曰忌之實惟懼之

序

五嶽山人吳郡黃省曾撰

夫文者所以發闡性靈敘詔倫則形寫人紀彰泄天化物
感而言生聲諧而節會乃玄黃之英華而神理之自然也
譬彼霞輝星彩匪繪而煥龍章鳳色不繡而奇豈出造爲
精機妙吐而已況夫深居几榻可達志於八方暫控形骸
得寓心於萬代一言耀帙黃壤如生片撰升堂藻園不廢
所以達賢古聖莫不尙之解繩以來六籍底績體各殊科
道由一致故裁訓者必依其本贊事者必准其實此命觚
之骨髓而執簡之要規也經熄時遷茲教燼喪飾虛者繁

眞核者寡炎漢御宇載煽王風西京之文號爲爾雅但渾質旣淪儒流瀾縱得之者虎蔚於藝林失之者螢息於晨草校披千載入室幾何蓋詞非僞借之可傳語必肺本而攸永來世方遠焉可眩欺鬼燦神昭若握柄宰如執簧之韻耕田之唱短調無芊眠之富直音無潤色之美亦且緝陟孔經采居匱史者良由出之惻怛嗟歎之眞自當流誦於無極也粵我空同先生嶽降於熙雍之運鵬騫於平章之朝夙稱八斗之才遂擅九州之秀非姬公宣父之書不涉於目非左馬班揚之策不發於筭非騷選李杜之篇不歷於思由是代方享弊樹獨幟於旌墟士舉安凡振孤轅

於廣陌雖和之者自萃珪璋之儔而訕之者頗繁參商之
輩物忌勢危終於擯落然先生風節凝持卓立不懼卒能
浣學園之污沿新彤管之瑣習起末家之頽散復周漢之
雅麗彬彬乎天下學士大夫莫不趨風而宗之自是挺宇
之內倡和鎔鈞文章經緯與三代同驅矣載論先生之撰
蔚雄闕衍無體格之弗統酌稟圓融何高深之弗臻矩之
音氣何密弗研獲其神精何奧弗範如玄造該包乎物器
海渤匪納夫波流五色錯以彪章八音和而協奏鬱憂愉
喜婉附委陳性靈著矣五道四德敦敷重締倫則表矣將
迎酬酢粹擷鋪綴人紀備矣兩閒萬貌縣絡籠挫天化宣

矣由是品擬先民則銓情播義釀浸於洙典星離縉貫幅
尺於丘明約暢淵綺橐籥於宋荀騁頓激昂陶鑪於遷固
緣方形侶合步於相如體新揮述齊能於杜甫祖轍求源
法同於康樂挾衰續古功並於拾遺誠游藝之鉅工而摛
翰之鴻匠也客有惜先生懸車之早以爲未究厥施者予
曰不然天生英哲或用之顯績或用之述經先生興起學
士挽回古文爲天下作者之首冠則天之用先生者不小
矣仲尼旅人騶軻弗甯亦將以爲未究厥施耶省曾樂志
衡門修辭海曲山川間之音通道契故先生於戊子之冬
以手編全集寄我姑蘇殷勤扎書屢貽疊受旣而先生問

醫南下邀予京口千里不遐命僕爲序辭謝再三屬委逾
至乃得論襟於綠雲之亭品文于大峴之山並館逾旬雪
涕成別長江悠悠雲帆遂遠歲之除夕先生告徂嗚呼緬
惟邂逅已然季子之許自顧淺膚莫稱陽冰之託勉撰斯
文恐孤泉下附於驥後且幸因之與日月而並遠也嘉靖
九年春三月十六日

大平春三月十六日

文思遠矣不可測也且幸因之與日俱而並發也竊歎
 此世之已然季子之指自願發實莫解焉來之指歟豈
 其以忿怒靈助激發也利又失坐者卧即和融
 至六也願發外絲雲之亭品文平大則之山並發也自雲
 而南不幾千里不數命難為乳翰櫛再三願發也

序

詩者人籟也而竅於天天者真也王叔武之言曰真詩在
民間而空同先生有味其言至引之以自敘夫空同先生
踳軼千古力敵元化乃猶稱真詩在民間而吾夫子亦曰
斯民也三代之所以直道而行也以吾夫子之聖不能外
於斯民之直空同先生固聖於詩也孰能外民間真音而
徒爲韻語古者先王命太師陳詩以觀民風吾夫子刪詩
先風而後雅里謠途弔至與清廟明堂之聲同鏗錡焉卽
清廟明堂登歌賡唱亦當時矢口發籟直布胸臆非如後
世文人墨客抽黃對白剪綵隋園學步邯鄲徒以韻語相

矜詡也自唐以詩取士而詩道寢衰而其真而近古者往往得於侘傺無聊不平之感故真者音之發而情之原從原而觸情從情而發音故赴響應節悠悠然光景屢新與天同其變徐而歌之暢然愀然足以感耳入心移風易俗美愛而傳亦與天同其久固知空同先生所以集大成而白帝此道者蓋有本矣余之梓空同先生集也豈自附污不至阿其所好夫亦願同志者皈依正覺毋蹈野狐外道抑嗤白雲秋色中原紫氣等語之爲魔軍余將倚劍空同而摧伏之矣是役也潘君景升校讐半載深窺作者心苦景升雅善詩名傾江左其欲皈依正覺則猶余志也夫萬

歷壬寅長至後九日古粵後學鄧雲霄敘於玉壺冰

秋王寅昇運於小日古學於學擬建書於於正德水

詩集自序

李子曰曹縣蓋有王叔武云其言曰夫詩者天地自然之音也今途駟而巷謳勞呻而康吟一唱而羣和者其真也斯之謂風也孔子曰禮失而求之野今真詩乃在民間而文人學子顧往往爲韻言謂之詩夫孟子謂詩亡然後春秋作者雅也而風者亦遂棄而不采不列之樂官悲夫李子曰嗟異哉有是乎余嘗聆民間音矣其曲胡其思淫其聲哀其調靡靡是金元之樂也奚其真王子曰真者音之發而情之原也古者國異風卽其俗成聲今之俗旣歷胡乃其曲烏得而不胡也故真者音之發而情之原也非雅

俗之辯也且子之聆之也亦其譜而聲者也不有率然而
謠勃然而訛者乎莫知所從來而長短疾徐無弗諧焉斯
誰使之也李子聞之矍然而興曰大哉漢以來不復聞此
矣王子曰詩有六義比興要焉夫文人學子比興寡而直
率多何也出於情寡而工於詞多也夫途巷蠢蠢之夫固
無文也乃其謳也呶也呻也吟也行喆而坐歌食咄而寤
嗟此唱而彼和無不有比焉興焉無非其情焉斯足以觀
義矣故曰詩者天地自然之音也李子曰雖然子之論者
風耳夫雅頌不出文人學子手乎王子曰是音也不見于
世久矣雖有作者微矣李子於是憮然失已灑然醒也于

是廢唐近體諸篇而爲李杜歌行王子曰斯馳騁之技也
李子於是爲六朝詩王子曰斯綺麗之餘也于是詩爲晉
魏曰比辭而屬義斯謂有意于是爲賦騷曰異其意而襲
其言斯謂有蹊於是爲琴摻古歌詩曰似矣然糟粕也于
是爲四言入風出雅曰近之矣然無所用之矣子其休矣
李子聞之闐然無以難也自錄其詩藏篋笥中今二十年
矣乃有刻而布者李子聞之懼且慙曰余之詩非真也王
子所謂文人學子韻言耳出之情寡而工之詞多者也然
又弘治正德間詩耳故自題曰弘德集每自欲改之以求
其真然今老矣曾子曰時有所弗及學之謂哉是集也凡

三十三卷賦三卷三十五篇四言古體一十二卷四百七十篇七言歌行五卷二百一十篇五言律五卷四百六十二篇七言律四卷二百八十三篇七言絕句二卷二百二十七篇五言絕句并六言雜言一卷一百二十篇凡二千八百七篇

潘之恒箋曰此弘德集序自嘉靖後所增亦無幾惟五七言律各一卷耳豈遺草尚多耶先生賦止騷而無漢故稱賦騷四言出入風雅乃不自居而曰四言古非體也易爲風雅什五言絕高古曲盡其變安得以少而抑在後乘如擬李古風五七言消之而名散篇體將安傳乎一

升之一別之各爲一卷總成三十七卷此可質諸先輩
所安不敢謂僭也序法本季札觀樂自左氏以下無此
音先輩 情作者苦心具見余有感於眞詩之言而慨
世之務相矜詡也屬上海喬生一璋手書揭諸首簡爲
將來指南云

柳來詩集

卷之四 文裕詩 一卷 蘇如三十 卷出 西齋 龍 夫 隨
傳 汝 不 知 歸 嶺 出 年 悉 本 季 以 購 樂 自 全 况 以 才 無 此
物 雖 難 南 洲 香 甚 心 具 良 余 百 願 殊 真 結 之 言 而 繼
卷 之 一 四 文 裕 詩 一 卷 蘇 如 三 十 卷 出 西 齋 龍 夫 隨

欽定四庫全書提要

明李夢陽撰夢陽有空同子已著錄夢陽爲戶部郎中時疏劾劉瑾遘禍幾危氣節本震動一世又倡言復古使天下毋讀唐以後書持論甚高足以竦當代之耳目故學者翕然從之文體一變厥後摹擬剽賊日就窳曰論者追原本始歸獄夢陽其受詬厲亦最深考明自洪武以來運當開國多昌明博大之音成化以後安享太平多臺閣雍容之作愈久愈弊陳陳相因遂至嘽緩冗沓千篇一律夢陽振起痿痺使天下復知有古書不可謂之無功而盛氣矜心矯枉過

直因樹屋書影載其黃河水繞漢宮牆一詩以落句
有郭汾陽字涉用唐事恐貽口實遂刪除其稟不入
集中其堅立門戶至於如此同時若何景明薛蕙皆
夢陽倡和之人景明論詩諸書既斷斷往復蕙亦有
俊逸終憐何大復粗豪不解李空同句則氣類之中
已有異議不待後來之排擊矣平心而論其詩才力
富健實足以籠罩一時而古體必漢魏近體必盛唐
句擬字摹食古不化亦往往有之所謂武庫之兵利
鈍雜陳者也其文則故作聱牙以艱深文其淺易明
人與其詩竝重未免怵於盛名今竝錄而存之俾瑕

瑜不掩且以著風會轉變之由與門戶紛競之始焉

命小蘇且以管風會轉變之由與門可必驟之故

明史文苑傳

李夢陽字獻吉，夢陽人。父正官，周王府教授。徙居開封。母夢日墮懷而生，故名。夢陽弘治六年舉陝西鄉試第一。明年成進士，授戶部主事，遷郎中。權關格勢要，搆下獄，得釋。十八年，應詔上書陳三病三害六漸，凡五千餘言，極論得失。末言壽寧侯張鶴齡招納無賴罔利，賊民勢如翼虎。鶴齡奏辦摘疏，中陛下厚張氏語，誣夢陽訕母后爲張氏罪。當斬時，皇后有寵，后母金夫人泣懇，帝不得已，繫夢陽錦衣獄。尋宥出，奪俸。金夫人懇不已，帝弗聽。召鶴齡閒處，切責之。鶴齡免冠叩頭，乃已。左右知帝護夢陽，請毋重罪。

而予杖以洩金夫人憤帝又弗許謂尙書劉大夏曰若輩欲以杖斃夢陽耳吾甯殺直臣快左右心乎他日夢陽途遇壽寧侯詈之擊以馬箠墮二齒壽寧侯不敢校也孝宗崩武宗立劉瑾等八虎用事尙書韓文與其僚語及而泣夢陽進曰公大臣何泣也文曰奈何曰比言官劾羣奄閣臣持其章甚力公誠率諸大臣伏闕爭閣臣必應之去若輩易耳文曰善屬夢陽屬草會語洩文等皆逐去瑾深憾之矯旨謫山西布政司經歷勒致仕旣而瑾復撫他事下夢陽獄將殺之康海爲說瑾乃免瑾誅起故官遷江西提學副使令甲副使屬總督夢陽與相抗總督陳金惡之監

司五日會揖巡按御史夢陽又不往揖且敕諸生毋謁上官卽謁長揖毋跪御史江萬實亦惡夢陽淮王府校與諸生爭夢陽笞校王怒奏之下御史按治夢陽恐萬實右王訐萬實詔下總督金行勘金檄布政使鄭岳勘之夢陽僞撰萬實劾金疏以激怒金并構岳子沄通賄事寧王宸濠者浮慕夢陽嘗請撰陽春書院記又惡岳乃助夢陽劾岳萬實復奏夢陽短及僞爲奏章事參政吳廷舉亦與夢陽有隙上疏論其侵官不俟命徑去詔遣大理卿燕忠往鞫召夢陽羈廣信獄諸生萬餘爲訟寃不聽劾夢陽陵轍同列挾制上官遂以冠帶閒住去亦褫岳職謫戍沄奪廷舉

俸夢陽旣家居益跣弛負氣治園池招賓客日縱俠少射
獵繁臺晉邱閒自號空同子名震海內宸濠反誅御史周
宣劾夢陽黨逆被逮大學士楊廷和尙書林俊力救之坐
前作書院記削籍頃之卒子枝進士夢陽才思雄鷲卓然
以復古自命弘治時宰相李東陽主文柄天下翕然宗之
夢陽獨譏其萎弱倡言文必秦漢詩必盛唐非是者弗道
與何景明徐禎卿邊貢朱應登顧璘陳沂鄭善夫康海王
九思等號十才子又與景明禎卿貢海九思王廷相號七
才子皆卑視一世而夢陽尤甚吳人黃省曾越人周祚千
里致書願爲弟子迨嘉靖朝李攀龍王世貞出復奉以爲

宗天下推李何王李爲四大家無不爭效其體華州王維
禎以爲七言律自杜甫以後善用頓挫倒插之法惟夢陽
一人而後有譏夢陽詩文者則謂其模擬剽竊得史遷少
陵之似而失其真云

光緒己丑冬用明季鄧雲霄潘之恒會蒐輯李獻吉先生
專集本去文祇刻詩集闕者嗣補并均刻明史本傳於卷
弁渭南巖嶽蓮識

平胃南苑急難端

集本志文新原詩桑關春臨蘇共批校明史本對無卷

亦游于任參用即季澄雲香齋之會黃輝卒相吉永全

矣之即而失其真不

大加考有類考則指文者限臨其歎謝懷讓野史要少

則以考其自林甫以發善用歸林海味之志謝

坊刻明史文苑李夢陽傳終無不律效其體筆賦王

空同詩集卷之一

百結全玉萃于皇門三星齊照大明北郡李夢陽撰

風雅什

天年禋社告日懸如天年祭辟雍振左棧二氣紘然百

甘露

觀牲

效五子之歌

有鷓

青青者蒲

有兔

河之楊

我行

始雷

我出城闈

河之渚

型範

歸壽

右次風雅一十五篇

凡六十三章

風雅什

禮社

禮社紀成也今

上肇禮于社臣夢陽以戶部員外郎從而賦禮社

元年仲春吉日維戊 天子肇修于社式對二后協於百

辟既祇既戒其日丁巳三星彗彗

百辟至止萃于臯門三星在隅乃辟乃闔有滄其雲有零

其雨赤舄蹠蹠于壇之所

八佾剡剡百燎盈庭左金右石鏞鼓孔行
帝命元臣曰
戎朕代式虔式穆厥維朕載

元臣受命爰肅其躬月出則光三星在中磬管喤喤有
萬斯舞爰配二辟犧尊維俎

於神來格殷殷番番龍旂載揚雷霆
嘒嘒明明對越肅肅
奔走神既醉飽錫辟之祐

適皇纘業配天子京三辰允禎曰雨曰暘皇降嘉實來牟
黍社敷文戢戈克紹冢土

天子至也禋社六章章八句
其來報報集神金匱百章

辟雍

辟雍紀視學也

天子至止于彼辟雍和鸞央央其來雍雍象輅金衡有蒼其龍光于廟宮是依是崇

吉日維申脩我元祀皇祝設樂鏞鼓萬舞有筐有篚以享以祀羣執肅肅秉德弗渝

誰其觀者三氏孫子其冠峩峩來忻來止翩彼鳳鳥集于東林繹其觀者其爛如雲

自門徂基辟儼若思青衿濟濟以辟以師爰命祭酒司業拜手訏哉嘉謀作民元后

帝若曰都戎言式弘匪道何程匪猷曷承載弼元理維協

乃有眾拜稽首 天子萬壽
旗旒旆旆淵淵伐鼓 皇發辟雍用惠下土自天降休豐
年穰穰藹藹王多吉人四國用康

辟雍六章章八句

甘露

甘露紀異也元年冬至甘露降於陵樹

於辟是興皇用錫祉苞有八葉侯茂侯采
填填墉壑有嚴廟宮湛彼露斯既霑既降
湛彼露斯于松于柏是暨是掇罔匪澤澤
苑彼陵樹有爛其華盈盈綦綦光于邦家

蕩蕩上帝降監在茲維辟時格豈曰匪時

其時伊何厥陽載升爰液乃濡惠我孔明

其昭伊何曰 帝攸績靡濫靡僭甘澍斯獲

明明昊天是歆是臧臣作誦言告于萬方

甘露八章章四句

觀牲

觀牲大儀也

赫赫明明 天子攸行以修肇禘以對于上帝

天子至止觀牲于郊龍旂交交馬鳴蕭蕭

帝至于郊於赫有臨載穆載欽曰歲事是歆

帝降于圉犧人脫福羊牛鹿豕僂僂濯濯濯濯牲牲翬
帝之圉其牲孔碩甫甫麇麇

城人伐鼓 帝至郊所干旄淠淠虎士孔武乘彼大路八
鸞與與昭于萬邦光于 皇祖

大禹曰 觀牲五章三章章四句二章章八句

效五子之歌

五子歌正德年效作

大禹曰咨咨太康女何樂于田十旬弗返百姓離迷女厥
緒用殄洛汭湯湯流于冀方曷歸曷歸我心憂傷
太禹曰咨咨太康敬哉有土毋荼毒下民毋曰民小毋我

崇尊天自我民明威

大禹曰咨咨太康天命難忱慎德者昌維帝克堪奄有萬方乃罔攸序上帝殛罰女

大禹曰咨咨太康毋遊于盤毋荒于田毋小人是庸嗜貨靡不顛毋曰予一人天下予何天方降爾瘳

大禹曰咨咨太康彼曰不臧是謀是從此曰既經是戾是戕不念爾祖獨不念爾土嗚呼敬哉敬哉天罔私隲女

五子歌五章二章章九句一章章八句二章章

六句

有鴟

有鴟諷也

有鴟有鴟集于喬林征夫遑遑以北以南居人之子我是
用覃

東人之子衣服粲粲西人之子車馬有爛中人之子樽樽

衍衍

誰屋室潭潭誰教獫有冠誰遇人艱難誰寤寐永歎

爾視爾友令色令儀弗視爾友靡臧靡嘉爾視爾友予德
予哲背姻背婭罔不愆蔑

朔日日虧十月其雷山川震崩星辰逆行二三君子匪疚
匪疾日時則然匪我敢逸

燕雀在堂翩翩其羽鱗鱗魴鱖在于河渚弗念弗畜孰獲爾所小子作詩誨言式女

有鴟六章二章章六句三章章八句一章四句

青青者莆

青青者莆感遇也

青青者莆生于汙池旃旒有翩君子攸悲

有蕩者道其木喬喬有鳥嘒嘒女有巢漂搖

有石巉巉在于中泉我思漑漑畏子不前

青青者莆三章章四句

有兔

有兔閔獵穉也

有兔有兔其來趨趨有罌罌虞人之縛

有兔綏綏瞻子傷悲豈女有母我子無所

爾粟爾糜爾有猫狸云胡樂而

有兔三章三章章四句一章三句

有兔三章三章章四句一章三句

河之楊怨離也

河之楊其葉幡幡子之歸矣誰與我晤言

河之湍兮我心惓兮庶見子旋兮

河之楊二章一章四句一章三句

我行

我行思也

采蠹采蠹于彼中野我行思子瞻望伊阻

我有蘧有俎湑湑我酷坎坎我鼓反反我舞

有筵有几我有桃李不見子都實維憂矣

我行三章章四句

始雷

雷于辰宜也然懼其弗施也弗威也又弗廣也作始

雷

雷之磕兮西山之陽兮翕兮張兮發坤藏兮闡而昌兮

雷之升兮列缺光兮驅罔象叶平兮劃幽匿兮維民之福兮

雷虩虩兮民愬愬叶入兮施甘雨兮昌下土兮登我稷黍兮

神豈無念始雷三章章五句

何文心 我出城闐人盡人盡千出闐行盡不盡茲非姓

我出城闐閔水也嘉靖甲申秋久雨水涌陸地行舟

我出城闐浩浩其流我車我馬登彼方舟昔也長薄乃今

舟之滔滔波塗昔也疇之

嗚呼蒼天雨無其極淤我良田浥我稼穡賣牛買船賣鋤

買楫夕之朝之濟有深涉章八句

彼負者子涉寒號咷彼輦者子陷泥中濤彼車者子馬顛

濡毛彼往來者誰子冠蓋而遊遨

我出城闈三章章八句

河之渚

河之渚送鮑氏也

河之渚鳧雁與與我駕我車載言送汝河水漚漚汝舟淠

淠冬十有一月甲申者歲

河之沙浩浩其霜人廬人處子也獨行廬匪不懷茲非我

邦豈無念處旋我舊鄉

舊山有廬溪則有魚有車馬驅有琴瑟笙竽烈風旆旆寒

日水瀨汝征汝邁

山有栲亦或有栲魚潛於淵或在於沼芻蕘之言君子敬
聽慎爾威儀擇爾友朋

爾生之類 河之渚四章三章章八句一章七句

求對介 型範 雲增非青郎

春日 型範省躬也 蘇安焄非堂非尊非鼻非其寶非臨

器土必型器竹必範綏則有蟬冠則有范哲人畏威爰矜

爰業省之察之春冰是涉 不非香也東選千平六十其千

帝命攸畀而胡罔嘉忽心乘之厥玉斯瑕聖戒罔念賢省

日三輿則倚之立則如參

淵魚負冰谷鳥嚶嚶賢豈在貴愚匪無榮維彼賢人省躬

靡疾彼愚何人外華中垢

型範三章章八句

歸壽

歸壽者李子爲東墅子作者也東墅子年六十其子

經自大梁馳而歸壽焉於是作歸壽

春日旣熙有繁其梅爰啟我堂我尊我罍穆穆其賓揖讓
先後介我眉壽飲我清酒

爾生之辰爾子遄馳何以獻之玉斗金卮春華載殷舞衣
爛斑庭樹青蔥鳥鳴關關

又何獻之嵩高之松翠甃屈枝盤盤如龍又何獻之維河

之鯉玉鬢曜陽金鱗泚泚

歸壽三章章八句

空同詩集卷之一終

同集三首章八句

空同詩集卷之二

明北郡李夢陽撰

樂府

衛女操

漆室女操

慧蛾操

哀鳳操

月星操

右次琴操五首

天門開

貽女

捐袂

懷鄉

君夷猶

騁望

雲阜

祀白鹿迎送神辭三首

步虛辭

芝山子辭

右次楚調歌一十二首

雷之奮
鳳之升

月如日

右次鏡歌曲三首

賦大隧

公儀休

青陵臺

射潮引

汝為我楚舞

博浪沙

左祖行

申屠嘉

轅下駒

栗太子

赤鳳曲

右次詠史一十一首

子夜四時歌八首

車遙遙

幽蘭

掌上舞

右次短調歌一十一首

樂府一

琴操

衛女操

舊說衛有賢女趙王聞其賢請聘之未至而王薨太

子曰吾聞齊桓公得衛女而霸今衛女賢欲留之大
夫曰不可若賢女必不我聽若聽必不賢不可取也
太子遂留之果不聽拘於深宮思歸不得援琴而歌
曲終自縊而死

有狐綏綏兮在彼河梁我欲濟之兮河無航瞻彼故丘兮
淇水淺淺懷我父母兮不能奮翻嗟嗟不能奮翻予安用
存兮

漆室女操

漆室女魯人也倚柱悲吟鄰人問曰欲嫁乎女曰吾
憂國傷人心悲而嘯何言欲嫁乎遂自經而死

父母不聽女言女義不至公門嗟嗟奈何朝倚柱而吟暮倚柱而歌知我者謂我心憂不知我者謂我求爲家予寧爲地上之茂草誠不忍負巖墻而生

慧蛾操

李子中庭而立有蛾窘於爵入檐而避之李子傷之作此操也

翼之漸漸兮入我檐兮慧遠賊兮信彼黠兮寧爾獲兮

哀鳳操

哀鳳操爲漢中張子作也張子三十而天子傷其孤

貧無歸也援琴而哀之

鳳之來兮爾胡為兮牛有阜兮雞有棲鳳兮鳳兮今何歸
傷哉命兮我心悲

月心操

元年冬十有一月其日己卯月在寅位金宿來襲李
子見之而憂作此操也

陰陽舛錯亦孔之選斤斤其月有星薄之嗚呼天高高在
上意安若兮

楚調歌

天門開

天門開兮冥冥沛余乘兮上征雷車兮電旗斑陸離兮四

馳陽昭昭兮在下女翩翩兮媵予交不周兮易離路超遠
兮徒自苦涉海兮揚靈揖陽侯兮貝宮采珊瑚兮嶼間折
三秀兮水中望佳人兮不來吹洞簫兮絕浦聊盤旋兮戲
娛時不可兮再有

貽女

龍旌兮玄牲重闕兮紫府夫君兮不可以見女躑躅兮徒
自苦衝風起兮河曾波巖岬岬兮桂蘿折瓊蕊兮貽女媒
不通兮怨嗟若有人兮乘游龍佩蒼景兮御清風陟帝左
兮右降又翱翔兮極中君游兮崑崙又夕宴兮王母緩節
兮永歌紛佾分繁舞望遙浦兮御舸吹參差兮愁予

捐袂

捐袂兮沙裔遺襟兮澧浦御重華兮九疑觀潺湲兮容與
神之來兮六龍翳瓊枝兮翠葆驅豐隆兮挾百靈來如雲
兮去冥冥來躡霞兮去乘霓連蜷兮復葳蕤山之桂兮
江之楓雲颯颯兮吹秋風班予馬兮延伫美要眇兮中渚

懷鄉

伐辛夷兮采芳芷葺荷屋兮蔭蘭渚佳人去兮不歸靈連
蜷兮愁望予涉世徑兮歷險阻駕玄驂兮又文牡歲冉冉
兮既不我留悵懷鄉兮汨夷猶葛藟離離兮石間雨冥冥
兮山之幽旋予馬兮故阿陟堂址兮搴女蘿霜露交下兮

亭臯秋風夕兮洞庭波山何爲兮巖從木何爲兮蒙密公
有亭兮何不日鼓瑟日鼓瑟兮復吹鱗愴娛樂兮萬福來
君夷猶

登樓兮送君日盈盈兮將落曖萋鬱乎帶長薄君夷猶兮

吹間

並去

作巢燕兮旣辭又鳴兮蟪蛄紛軒蓋兮總總君胡

爲兮南都若有人兮被杜衡帶薜蘿兮蕙纓中有懷兮荃
不知臨修路兮悵天涯悵天涯兮望煙渚信予美兮誰與
龍城兮貝闕君暮趨兮朝謁采芳芷兮江中寄佳人兮天
北

騁望

送佳人兮江渚嫋嫋兮雲氣下烏翩翩兮戾止蟬暮吟兮
獨苦余遭迴兮隱軫審中洲兮偃蹇心相親兮口難言目
不覩兮日以遠風濤兮浩蕩涉浦兮騁望蘭被汀兮歲荏
杜參差兮夕漲君稅楫兮前坻復容與乎中渚恫怛兮將
從憺淹留兮誰與

雲旱歌

望君兮曾波雨霾兮兩河驟豐隆兮駕馮夷蹇將至兮風
薄之吹笙兮擊鼓絙絃兮會舞君不來兮使我心苦雲冥
冥兮晝晦神靈惠兮甘雨我稷兮我黍穀之兮士女編龍
兮堂墀禽蜥蜴兮水際吐雲兮上下使鳩鳥兮騰逝紛總

總兮神欲下
焱爲駕兮龍爲馬
君誰須兮不來日將莫兮
怨思

祀白鹿先生迎送神辭三首

吹玉簫兮眺帆浦
橫蔽江兮美無舸
蹇躅兮旋望宛窈
窕兮山之左陟
山左兮降右忽而
來兮倏而去跨白
鹿兮導兩螭色含
笑兮心莫知既登
兮山椒復南涉兮
石瀨日冥冥兮欲
暮風飄飄兮吹蕙
帶

右迎神

綠蘿兮紫萸桂生兮羅戶
風颯颯兮若有望神驅雨兮
泉浪浪躒我階兮坐我几
以彭郎兮挾匡父蘭葳兮
椒醕日

中兮萬舞美孰怒兮飄忽逝雲離離兮怨余

右降神

迹不偕兮心相疑懼雖諧兮愁易離君荷衣兮蕙帶逍遙
山中兮桂為蓋天門兮既闢騰而上兮雲之際石有澗兮
山有峯心相慕兮交不逢稅吾車兮繫馬願褰衣兮從子

右送神

步虛辭
被霞衣兮芝蓋藹沛騰兮影長帶魂逖逖兮天門奄周章
兮雲際吹參差兮槃舞燈繁紛兮不歌以鼓水以陸兮濟
鬼福釐洵兮冀望苦

芝山子辭

山之芝兮蕨黉子出遊兮不歸子不歸兮翳薜蘿蹇余獨
兮山之阿山阿兮望子芝爛爛兮莖紫從子兮齋房帝座
兮顯清天門兮不易通子歸來兮山中石磊磊兮路修日
暮兮不我聊

饒歌曲

雷之奮翕兮張山之陽發坤藏闢哉昌羣龍載浮列缺光
列缺光烜中土惠甘雨介稷黍聖人垂衣民歌舞民歌舞
祛禍蓄饑而食飽斯嬉厲鬼潛滅維福基

鳳之升附龍雲儀萬方昭帝文昭帝文承宗禮安如山翕

如坤兩宮豫協天神帝臨朝奏雲門戛鳴球笙鏞振昭四方明萬民萬民愉庶物亨陰陽熙乾道成乾道成皇業昌軼周妣纘塗戎臣稽首歌雲龍

晉谷不月如日

月如日光如輪輪五色纘哉紛貫紫霓揚風翎扶太乙侵紫庭化爲白氣干天經張我弧挾我矢祛葭滅妖天下理

詠史

賦大隧

賦大隧兒賦隧中母隧外母思啟段段已舉不及黃泉是
何語穎人不來其柰汝穎人不來猶之可俎上分羹痛殺
我

壽春子公儀休

園中豈無葵相公柰何饑相君卽無衣不愛室中機相君
千萬歲請治相君棲桓公霸諸侯管氏有三歸

青陵臺

兩山當中開露出青陵臺北山雖張羅南山烏不來我在
南山自有匹馬牛之風豈相及吾頸可斷志不易

射潮引

錢塘八月潮水來蛟龍奮怒濤爲雷天旋地折不可止此
中云有鴟夷子何不張爾弓挾爾矢射殺鴟夷潮可止君
不見潮水年年八月來萬弩射潮終不回

汝爲我楚舞

汝爲我楚舞吾爲若楚歌黃鵠翼成將柰何黃鵠一舉橫
四海君王豈有四海羅君無四海之羅安用此殃君美人
毒君子

博浪沙

博浪沙中挈椎走鴻門帳前撞玉斗誰謂張良貌如婦赤
帝子起鞭赤龍臣也請歸從赤松赤松子在何許君不見

朝烹狗暮縛虎

左袒行

陵曰不可平曰可安劉者誰勃與我產不信祿不入軍右袒計安出

申屠嘉

鄧通小臣敢皇侮錯也何人毀廟堵臣欲戮通帝弗許請收錯誅帝罔與含血自殲報皇祖

轅下駒

鄭當時轅下駒韓安國兩首鼠禿老翁竟斬汝廷臣不語淮陽語君不見金家婦王家女一言殺兒還殺母何況區

區老秃且

栗太子

燕燕汝今銜泥向何縣遮天蔽日過長安堆泥作塚高如山飛來未央宮銜取梁上土黃口見母來啞啞張吻索蟲哺

赤鳳曲

前赤鳳後雙燕頭岑岑兮尾涎涎組幘郎君夜相見相見騎白馬驚起城上烏城上烏據巢食兒夜相呼

短調歌

子夜四時歌

共懽桃下嬉心同性不合懽愛桃花色妾願桃生核

其二

柳條宛轉結蕉心日夜卷不是無舒時待郎手自展

其三

獨夕玉階側仰看三星爛畏熱不歸房徘徊夜將半

驚棹出驚流回橈戲清沚擘破芙蓉花中有雙蓮子

涼風吹玉樹團扇置不理儂亦有涼熱何況戴冠子

辭葉其六

辭葉其六

辭葉其六

摘葉裊流螢應手葉先落本無牢根蒂虛怨秋霜薄

涼風吹其七

郎住西水頭妾住東北澣何能冰遂合永免風波苦

其八

雪飄悵難行室邇阻相覓不畏風色嚴畏此雪上跡

右四時各一首

車遙遙

車遙遙遙遙復邁邁望見秋塵起不見車輪轉知在秋塵

裏

幽蘭

幽蘭敷紫莖羅列生堂基踰時君不采隔情當怨誰

掌上舞

晨遊憩陽館夕宴戲風臺盈盈掌上舞飛飛素雪迴

空同詩集卷之三 臨幽三十八首

明北郡李夢陽撰

樂府

擬前緩聲歌

擬烏生八九子

郭公謠

豆娘子

榆臺行

白毛行

長歌行

禽言六首

猛虎行

董逃行

秋胡行

君馬黃

飲歌行

阪田行

豫章篇

仙人篇

升天行二首

洛陽陌

丹霞行

雨雪曲

陽鳥篇

湖吟行

虎欲齧人不避豪賢篇

白手行

獨漉篇

苦熱行

鷄鳴篇

朝吟行

立熊篇

遊子篇

豫章行

析薪二首

空同詩集右次雜調曲三十八首

樂府二

雜調曲

擬前緩聲歌

萬水東流魚西上游不虞彼有漁子置我於其鈎魚告漁
子女曷太荼寬大福厚不見是圖漁乃偃僕伸鈎我脫身
以游漁起揮手謝天命各有由此魚銜明珠來報當日漁

擬烏生八九子

烏生八九子八九子餵飼兩老烏乃在城牆高樹頭兩老
烏拮据爲巢心中實毒荼晝夜餵飼八九子八九子長成
各自飛不來顧老烏巢風雨巢漂搖今年有巢處來年哺

子何處所猛虎能食人尙復有子之親螻蟻極細小蟲奉
事長上禮若君臣何得朋友如路人上車逢所知下車稱
別離淚下如雨眼迷離來時不知南不知北我去何勞問
東西車輪班班轉老烏飛飛啄赤莧

郭公謠

赤雲日東江水西榛墟樹孤禽來啼語音哀切行且啄慘
怛若訴聞者悽靜察細忖不可辯似呼郭公兼其妻一呼
郭公兩呼婆各家栽禾栽到田塍誰教檢取螺公要螺炙
婆言攝客攝得客來新婦偷食公欲罵婦婆則嗔婦頭插
金行帶銀郭公唇乾口噪救不得哀鳴繞枝天色黑

李子曰世嘗謂剛後無詩無者謂雅耳風自謠
口出孰得而無之哉今錄其民謠一篇使人知
真詩果在民間於乎非子期孰知洋洋峩峩哉

豆娘子

豆娘子者蜻蜓之細也輕盈側媚羣游而寡忌李子

見之傷焉作豆娘子

汝何者物小而輕盈灼約悠揚朋從寡畏緗衣紺裳或翠
其衿或朱而黃嬉戲長莪窈窕水旁餐膏浴滋飲露吞香
才不我知謀甯自滅兒童撲弄姬媵憐傷豆卿子卿娘子
豆娘百卉隕零北風雨霜弱不敵威蚱蜢同戕肅肅鴻鵠

雲海翱翔噉噉者鳳覽輝梧岡微末之蟲何勞短長

榆臺行

其事在弘治乙丑年

榆臺高高風吹樹梢都搖搖臺下黃羊走黃蒿山頭看看日落罽策四面吹軍中白旗身姓誰向前看有河河水深彼不怕死我亦人力能拔虎尾人虎或兩存歸爲鬼雄榮爾魂

白毛行甲申元日作

元日地動生白毛發春當暖風蕭騷天時尚然有錯迕老夫何怪兒童曹君不見猛虎失勢人寢其皮惜也豈復能咆哮我歌白毛比之董逃

長歌行

籠中鴨望水中鴨一鳴一答汝雖有羽翼不如我汎淥波
食魚鰕奔蘋拍藻入煙浦籠中之鴨心徒苦

禽言

泥滑滑車馬不得安何不停車繫馬待泥乾

其二

行不得哥哥東有木公西王婆南面設罾北張羅行不得
哥哥

其三

姑惡姑惡小姑刺齷姑不樂新婦早煮舖低聲奉小姑

其四

提壺盧壺盧提盛酒背母私餉妻妻可再得母恩罔極

其五

瘦兒瘦兒汝爲上留田汝爲尹伯奇獨行哀叫心內飢日
逐綠樹啄蟲蟻汝父汝兄甯得知

其六

不如歸去南山豆熟北山有黍

猛虎行

猛虎本居深山我可不入彼來亦難誰令爾今來市中遊
盡日攫人食撐腸拄腹無歇休我欲擊之刃不在手欲往

告秦山之君陸無車水無舟猛虎聞言向我怒我命在天
匪虎懼嗟嗟虎尙有時鴟鴞遺音甯爾知

董逃行

涉江登彼西山下看城郭鬱盤城中閣殿斑爛嘉樹一何

紛綸上有鳴鳥旦暮間關遙望我心浩歎一解闐闐寂聞民

生何艱終朝缺突無煙胡彼來往翩翩綺衣車馬可憐二解

誰家起樓造天歌鐘舞管喧闐剝羊宰牛列筵何但一食

萬錢倏忽日薄重淵三解明燈熒熒爛堂綉幃雞舌流黃樂

人調瑟未央千年萬歲奉觴豈知老至悲傷四解日月逝矣

不我留精銷時往霜霰交流繁華零落山丘心懽意愛爲

他人收哀哉胡不德求五解

秋胡行

鸞鳥不可為鴟爾胡不思顏淵掇塵尼父見疑我今乃何

敢望聖賢人心中憤悶徒苦悲智見萬里水清終見底一解

高高山上臺彼居者何誰厥狀蜿蜒伺人意欲牽纏汝雖

見其形不見汝情乃胡營營相煎豈不聞我命在天二解直

道古難容樹喬風集顛周公有何疵愆乃為四國流言伯

奇掇蜂不為父憐跡有涉疑惟賢知賢三解潔色為妒媒危

言良見災讒說久自明非時麟聖哀孤松摧為之薪水東

西流欽猶鬼神四解

四解

軍水無快錄氣問旨向廷感聖命

君馬黃

君馬黃臣四驪飛軒駮駮交路遠錦衣有曜都且馳前徑
狹以斜曲巷不容車攘臂叱前兵掉頭麾后驅毀彼之廬
行我輿大兵折屋梁中兵搖楣櫨小兵無所爲張勢罵蠻
奴爾慎勿言謀者來幸非君馬汝不夷

歛歌行

虎狼不可羣日短途路長魚瘠稻復澁蔬芝雞鳳凰篤之
無恩澤背面輒詆戕鎬銖苟不平持刃起相傷剽悍復譎
詭水土性輕揚哀哉茲土民詠歌以難忘

阪田行

空同言集
卷三
六
阪田賦離離子母長寒饑昨聞接京軍征夫曷時歸特生
阪田樹下有往與來黻裳四牡雖榮不如與妾共餽糜網
魚不施綱孰能制魚死征夫歸來歸來不見靈寶公安陸
子

豫章篇

晨出南浦橋不見橋上樓但見火燒骨橋下水不流北風
吹枯樹枝無一人來遊妖鳥羣啄嗚啾啾汝何不此地重
起樓吳監大舶來越珍銜舳艫豫章之火心大茶

仙人篇

何者一老翁耳垂兩肩綠瞳方來此芙蓉峰招我同行聳

身卽老翁授我玉杵丹攜手遊洪濛東云王泰山顛飛瀑揚
膏波清松蔭石關饑噉掇瑤草渴飲玉屑泉晨朝吸沆瀣
夕憇若木間俯視九區內傷心淚汎瀾
九州非我居我思遊冥荒飾輿驂玉虬乘氣切天翔朝餐
發匡廬夕暮嵩華陽上謁帝座側回旗拂天昌牽牛擊河
鼓織女方七襄

其二

扶桑躍陽彩海氣騰瑤光六龍抗斗樞九帝開雲間振衣
躡仙蹤飛轡鸞鸞翔仰身操天瓢手勺沆瀣漿朝嬉太乙

館夕憇玉女堂馳情覽八極縱目窮遐荒環運無恒存逝
代多隱傷回旌拂九曜捷步登文昌進謀芝蓋側待問紫
玉房羣靈贈大藥諸御傳神方無惜一粒分遂令民壽康

洛陽陌

嚴飈卷枯藿霜隼厲秋翩翩騶馬子意氣亦何赫朝馳
上東門暮徧洛陽陌臂彎兩角弓寶刀雪花白借問此誰
子無乃漢相如昔挈一束書今乘駟馬車虎士爲執鞭縣
令皆前驅傾城莫不歎觀者填路衢舉手謝鄉人榮耀但
區區丈夫樹名勲所志在唐虞揚袂徑北去萬里誰能拘

丹霞行

毀譽榮辱至海波何時平
海中有仙山仙人築爲城
金銀爲室闕桂樹羅階生
鸞鳥翔且舞美女稱飛瓊
僮侗擁我蓋王子左吹笙
踟躕聊戲娛餐芝翫西傾

雨雪曲

冬十一月阻舟徐汊朔風北來雨雪紛下禽鳥凍寂洲村

蕭夜纜夫來言衣單腹餓波流洄洄促船難駕我心悽惻

羽翼儻假

一解

七月燠土今幸雨雪往者難追來春可沃我

雖波阻心則怡懌購蔬城市貸米逾澤原阪蕭條雁鴻輯

集貧士罔懷

一陽環復

二解

青青者衿涉江我求大澤寒冥

胡子能來鷺鷥難飛潭網頓集網收魚跳閱忘寢食荒岑

險艱豈我能處南紀凍肅返北于土三解

集賢士陽鳥篇

陽鳥攸居於渚於野飲啄紆徐行步閑雅我舟觸驚振翰
若雲飛之有序還集成羣陽生豫知延頸跂望舉翼萬里
雲羅空想

湖吟行

魚游于水游于水而鳥游于水飽之去斯雲昧湖窈冬序
僚慄竟日無人草莽冥寂百怪鳴叫原濕誰主有一罾夫
荒濱守罟疑非恒人問之弗言汝胡者人單到此間

雙譽榮虎欲齧人不避豪賢篇

吾之於人誰毀誰譽貌失子羽言失宰予知我者天君子
洗心行不愧影寢不愧衾何樹嶷嶷于畛之特有撓俾鳴
僂風者惑漢申黨人宋嚴僞學冥鴻逝豫轅駒局促非林
何棲非淵何潛駟馬憂患貧賤德音富而可求其從如雲
徐子起欽顯者茂聞

金瓶梅
獨漉篇

獨漉獨漉棄田求屋其屋雖大其人則餓小人在旁譬如
蠶蝟恩之雖勤芥之則螫歲歲艷陽桃李吐英未曾結實
誰辯苦蜜錦繡圍厠過者掩口珠玉委途奚異塵土臨淵
趣輪臨壑振綏人孰不聞亦孰不知綦約之美不以爲纈

身尊道高名為雋傑

窮嶽苦熱行

圍頭戲香餅口粒正委教笑異壘上詔闕

蘊隆焚如二儀為鑪赤曦鑠天塵沙沸途居奚諱袒行弗
擇憇魚伏於困鳥張其喙何物為炭誰乎為工橐之鼓之
金流石鎔閭風之顛瑤沼之陰颺輪扇涼冰壑嶽崆下踏
層雪上攀琪樹仙人綠髮逍遙箕踞俯闕人世溷熱交毒
我欲從之安得羽翼

雞鳴篇

雞人宋淵明學真新改齋鄰圃試與林

雞鳴月落飄風振宇駕鵝曳陸翔鳥雲舉曜靈初出浮雲
翳止驅馬東行條其嘅止

思昔朝吟行言營昔失信于薄愚昔錄一至

亭毒既周明星有爛義和授鞭九宇將旦寐者欲覺寤者

慨歎巉巉檜柏覆我中庭雞鳴於顛微霜夜零閭闔未啟

九闈尙局馳神紫極振珩闕庭心錄交交昔常

神錄取玄熊篇以沐其野錄交交之向沐要古錄故文

猛士守四方四方塵不揚玄熊在深山百獸皆遁藏一解獵

火舉四澤虞羅亘長雲毒矢積如蝟玉石誰能分二解熊皮

充下御肉亦登君庖豈若犬與豨卽死無咆哮三解不王

游子篇

游子在他鄉所願親壽考冰犀遊於淵惟願水長好礪石

雖孤處不羨風中沙葛藟能纏綿不如絲與麻

豫章行

黃河雖大川所嗟源不清千里能一曲不如直道行王允
輔京室李杜垂其名介休巾角折乃為時所傾

析薪

析薪如之何爰以析其理結交如之何相要在終始女蘿
施松柏女蘿千尺長結交不知心結交安得常

其二

列曜垂四隅燦燦冒中土箕星乃好風畢宿復欣雨汎觀
愚哲士戚戚各有營哲夫計千載愚者終一生

空同集卷之三

明北

樂府

公孫河

空城雀

野山

石城樂

大堤曲

直陽

白銅

直陽

襄陽

大行

渡河

直陽

空同集

孤處不羨風中沙揚言能為我不知然則

難行

大川所嗟嘆不滿千里能一曲不知道行

其理甚俗介休中道新又為時所

所辨如之何友以州其理結交如之何

結交不知必結交安有

中士貧難乃好風畢得放爾

若夫計千載愚者終

空同詩集卷之三終

空同詩集卷之四

古大樂府曲三十四首明北郡李夢陽撰

樂府

公無渡河二首

空城雀

野田黃雀行

石城樂

大堤曲

襄陽謠

白銅鞮

襄樊樂

襄陽浣婦行

鴈門太守行

渡河篇

黃鵠篇

煌煌京洛行爲曹縣王子賦

南山篇
仙人好樓居三首

白馬篇

將歸篇

答客

擬燕歌行二首

芳樹二首

鳴鴈行

知足吟

直如絃

采菇曲二首

雙燕篇

古別離送龍湫子

史烈女

孤鵠篇壽程生大母

右次雜調曲三十四首

樂府

雜調曲

公無渡河

盤螭作川梁功奇勢難久
魴鱣尾屣屣天吳戴九首

其二

公無渡河河深不可渡
中有白石齒齒嶄嶄兮
峩峩蛟龍九頭戴角崢嶸
峯磕兮水鱗鱗兮衝素波
公無渡河吹沙暮多風
河伯築梁結兩螭汝無羽
翼墮水中涉水雖可樂
不如登山阿噫嗟嗟公無渡河

空城雀

雙雀下空城穀穗黃離離
二雀跳跟鼓翼啄穀穗其朋千

百咸來集小者啾啾是其兒誰者翁嫗被髮曳鞵來打雀
 雀薨薨飛上城嘈嘈鳴兩人恰欲抽身雀便復集回頭罵
 雀辛苦長得禾汝忍飽之我無粒手中乏利彈又蔑網羅
 天旋日昏奈爾雀何

野田黃雀行

樂樂其所自生禽獸過其故丘悲鳴黃雀游野田焉得鴻
 鵠高舉情鳳凰靡世見生長丹山依玉禾白於脂飽之忽
 來飛仲尼逢子西乃被接輿譏

石城樂

盈盈窈窕女當門是誰家十三學畫眉十五擅琵琶邑中

有盧家此女名莫愁向前問此女女聞雙淚流二十嫁夫
郎重門阿閣房臨牕種桐樹五年如身長自渠下揚州置
妾守空樓悔不快剪刀斷水不東流

大堤曲

漢水白離離月落山黑時堤頭石不平走馬誰家兒儂住
襄門西而在漢水北浮橋不着纜郎詎得儂識大舶何處
來落帆向儂濟高鞞白舡子識是真州估

襄陽謠

一灘高一尺十灘高一丈湍急石巉魚何由上棹戕櫓折
俾我心愴順風沿水舉帆千里

白銅鞮

誰家池高陽池日暮歸倒接離醉如泥汝爲誰拍手歌襄陽兒

襄樊樂

立檣如麻卿來誰家新燕營巢風中滾沙鷓鴣逐鴛鴦金井石榴黃珍寶丘山積擅名黑門廂

襄陽浣婦行

彼誰者媼吾家浣衣新寡寒賤鬢髮霜飛體無完衣十日九饑態度則殊辯是知非媼泣荅言妾襄宮女少小入宮荷主憐顧四十始出嫁爲民婦灌田采薪奄就貧窶舞裳

綻汚形容改故夫死男孺藜藿靡救嫗咽復言侍襄定獻
幾三十年王有義辭皇嘉特宣父子俱覲妃嬪如煙鈿第
載路龍旂飄翩御使絡繹珍車班班漢峴同清天歌播焉
衮烏南還層城言言烏春日妍桂宮有延傑臣觴壽玉娥
奉筵王旣捐世變來罔度聞見駭異古殿寂寞嫗勿更言
萬類咸爾厥亦天道安之則已

雁門太守行

雁門太守汝何人治邦三月稱明神我有牛羊賊不來掠
我有禾黍人不敢割昔我無衣今有袴著我思禮拜太守
太守不見憐但聞太守身姓邊紫髯廣額聳兩顴太守出

門四牡騤騤後擁皂蓋前導兩麾行者盡辟易居者不敢

窺旁問太守胡所之云訪城南皇甫規春思賦我太守

小麥黃黃河波君奈何今渡河昔君游此思君一見經旬

累月不君一面君今渡河乃往何縣跂予望之淚下如霰

汀有鳧兮沚有蘭枝相亞兮居不單人生心事豈有殫君

慎動靜加君餐信鳥春日散卦宮律致將田賦壽王敏

黃鵠篇黃鵠游四海倦言還故邦中路失其雌三年廼有雙鴛鴦

毛羽縟哉工鳳儔鶴匹渠豈同嫵婉歡娛殺酒豐琴鳴瑟

奏芳夜中樂極思來內忡忡驗新迫故悲悔叢人生萬事
慎勿輕易狸鼠之能詎逮騏驥車牽美期谷風興刺我心
自知聿斯語誰

煌煌京洛行爲曹縣王子賦

時風布陽和韡韡華春木清朝富才賢藹藹冠蓋屬努力
競高路鷄鳴起相逐白日耀飛轡流雲翼行轂同里多彙
薦一門有聯躅蹶彼曹南士雙雙皎如玉聚鳴各當晨連
翩一何急煌煌京洛內濟濟英妙集二郎紳委蛇三四錦
翕熠大郎雖未官俯身拾班級入室談仁義出與卿相揖
聲名旣烜赫性行復剛執見者勿徒羨青雲貴自立

南山篇

南山何巖巖上有孤鸞凰佳偶永相失日飛夜悲鳴遺腹
生雛哺之良艱晨采竹實暮取琅玕吁嗟哺之良亦艱雛
成被九采翱翔覽四海四海覩光儀阿母亦榮輝峩峩相
公門屹與南山齊自有鸞鳳來棹楔增崔嵬相逢且莫言
聽我南山篇

仙人好樓居

晉書謝安嘗謂王坦之

津津海中洲峩峩白玉樓上曾結浮雲下戴神黿遊前簷
蔭白榆青龍守門樞上有無始公餐霞煉金腴飛瓊鼓立
橐浮丘扇其隅情閑覽八表出入服氣輿日月跳兩珠廻

旋但須臾萬年永福昌寤言莫相忘

其二

謁帝華蓋側沐髮咸池旁巖巖雲中樓文杏裊爲梁黃金
走闌干銀闕前相望聳身若輕翼登之窮四洋四洋扎荒
沕波瀾浩揚揚九州一何拘歛顏歸洞房屑玉煉精魄用
神無何鄉萬年永福昌寤言莫相忘

其三

乾鵠知來風靈人炳先幾超世構巍峩上與飛雲齊舉手
拂天河白石寒離離牽牛不服箱織女棄支機孤鳥銜若
華東來欲誰詒海水淺以清俯之嗟歎咨眷茲勿輕道翩

翩衆鳩馳萬年永福昌寤言莫相忘

白馬篇

白馬紫金羈揚鞭過市馳萬人皆辟易言是賣珠兒生長
本倡門結交蒙主恩寢食玉榻側獨聆優渥言取金大長
秋徵歌李延年家住十重樓珠簾白玉鈎綺繡裁襦裳妖
豔無匹儔片言卽賜第意氣凌五侯

將歸篇

對面有乖絕千里長相思登高望來車入門賦將歸驚風
何飄飄獸兔莽間嘒羣鳥各有趨他鄉難獨依獨依令人
惑悠悠浮雲馳悠悠尙可道霜露隕百草

答客

子去有何見來之奚所聞願客且甯坐爲子請敬陳丈夫
志四方出門轍同輪人心投合諧匪必鄰里親長風會枯
蓬飄飄逐飛塵既東忽復西聿誰究其因引觴就岐路有
懷庶能伸

擬燕歌行二首

花稀葉豔藤蕪芳皇皇溥原修且將陽浮野曠雲飛揚風
沙眯目燠氣黃禽獸阻饑狐在梁興言送君還故鄉牽袂
欲別立徬徨延視極騁中自傷締交心違斷肝腸爾去孰
予共杯觴蘭撓桂榘文荔檣逝哉汗漫凌洪洋安能假翼

東南翔何人贈君紫玉璫又何贈之雲錦裳永言嗣茲無
我忘

其二

銀河耿耿秋夜長牽牛織女限河梁終日弄杼不成章延
頸北望涕沾裳自君別我之他方錦衾燦兮獨空牀北風
發發天雨霜鴻鵠垂翅不能翔谿谷天寒林樹蒼道路欲
歸多虎狼人煙斷絕乏資糧爲君憂愁斷肝腸思策良馬
逝君旁中道失路河無杭攬衣踟躕夜未央願爲浮雲歸
故鄉

芳樹二首爲上海陸氏賦

陸出東坡故硯姑蘇全肩筆索余面賦一字起十字
止

嗟天運春奄暮翩翩者鳥集于芳樹芳樹生路隅車馬一
何多朝看桃李華夕看桃李柯爰登高丘以望遙見長安
綺樓樓中美人彈瑟如聞三歎未休客乘白馬繫樓下秉
燭置酒娛夜遊美人贈我錦繡辭把玩不異珊瑚鈎林陰
溥露羅袂薄明月照闌那可留嗟乎人生何不共努力君
不見城鴉哺子忽生翼

其二
前缺八字句此篇足之

猗君子道爲貴貪夫所欽駟馬高蓋東家雖椎牛不如西
家齏雖有文馬千駟不如西山啜薇猗嗟富貴良何爲瞻
彼青青兮陌上林穠華灼灼兮一何早涼風有時漂搖來
吹汝坐見淒淒白露滿芳草願采青松寄情親於遠道

鳴雁行

鴻鵠高舉摩天飛渴飲沆瀣餐靈芝翅拂日月雲爲衣卽
有矰繳安能施下遊滄海高河漢我思與爾時相見羽短
毛長何足辯

知足吟

衡門可栖藜藿可飯錦綺雖麗韋布自暖車馬雖貴豈若

白如玉簪香如玉田禾行人且莫行聽我采菇歌儂家
住在黃河曲一日波濤怨殺河河來有魚去有麥麥下秋
霜菇菜多不求河向城南去只願年年河不波

雙燕篇

雙燕來故室不見阿母語穿牕入幕尋阿母哀鳴欲棲還
復舉喃喃止翠桁徘徊拂素幃浮塵積玉珈斷蘚生畫衣
雙燕年年春社來阿母阿母何時歸

賦得古別離送龍湫子

盈盈楊白花汎汎綠波水化爲萍萍草乃與人相侶飄泊
無根蒂隨風任流止今日歡聚客明日倏千里千里異鄉

縣有時復相見
心情豈固殊
所嗟形色變
一見復一別
少壯頭盡雪
老大未足傷
願言崇令芳

史烈女

史烈女者杞史氏之女也
未嫁而死其夫是踰禮以
守信破經而成仁者也
李子曰史氏女有激俗之功
焉然予聞其言矣於是乎述

梨花如雪霜鴛鴦不成雙
我心明如鏡我心清如水
鏡明有塵時水覆無收理
古昔華山畿行人下馬拜
春風兩蛺蝶綠草搖衣帶

孤鵠篇壽程生大母

空同詩集卷之四終
有孤者鵠毛羽蒼靈氣勃勃吞秋霜饑餐玄圃禾渴飲瑤
池漿朝從金母遊夕挾飛瓊翔生有二子二子生八雛雙
雙崑崙之巔漱芳茹膏殮玉腴上下嬉紫虛青鳥爲伴文
鳳俱俯視鵠鴉鷓鷃何啻萬萬輩喑喑啾啾啄腥穢

空同詩集卷之四終

豈固殺祖與紙色變一具更一似公

空同詩集卷之五 賦燭一十五首

明北郡李夢陽撰

樂府詩集

三氣王公詩集

塘上行

豔歌行

甄氏女詩

師曠歌二首

五仰詩五首

淋池歌

招商歌

順東西門行

妾薄命

苦哉行

嗟哉行

朱榴篇

行路難

白紵詞三首

右次雜調曲二十一首

河之水歌

想像歌

鷄鳴歌

內教場歌

叫天歌

招安歌

賊逃歌

愍災歌

愍燠歌

姚源歌

歎乃歌

和方山子歌

樂已哉辭

三原王公壽辭

招隱山辭

北溟李英題辭

空同詩集右次古調歌一十五首

樂府

雜調曲

塘上行

蒲生何離離過時采者稀莫言采者殊盛衰自有時解一昔

與君相見不謂行當變讒言使交流水清石自見解二孔雀

東南飛十步一徘徊羅鷺羽翼短安可作雄雌解三今日樂

相樂飲酒行六博蒲生枝葉多中心亦不惡解四

豔歌行

杲日出扶桑照我結綺牕綺牕不時開日光但徘徊解一通

阡對廣陌柳樹夾樓垂上有織素女歎息為誰思解二步出

郭東門望見陌上柳葉葉自相當枝枝自相糾

三解二出

甄氏女詩

予讀魏記見甄氏女失身以讒被誅即其絕鳴之音

至慘戚不可讀而竟以讒死悲夫然卓氏女亦奔相

如作白頭吟何所遇懸絕也陳思王浮萍詩或稱託

風於甄氏比之長門成敗異矣豈非事人者之永鑒

哉

種樹高堂下枝葉何留留辭家奉君子置我青雲樓一朝

意乖別棄妾忽如適昔為同溝水今向東西流獨守結心

脾夕暮不垂帷明月鑒玉除清風一何悲曳絢立中庭仰

見明河湄明河光不回念妾當何依沉思仰天歎淚下如

斷縻

琴瑟師曠歌二首

詳見樂書

宮筵肆兮哀絃拊玄鶴降兮鳴且舞呼煙侶兮嘯雲友誰能爲此師曠子

人觀雲白右玄鶴歌

招白雲兮會天鬼雨冥冥兮風不止君好音兮徒自苦民悲嗟兮離棄女

高山右白雲歌

五仰詩五首

余懷五嶽尙矣婚嫁未畢頗有向平之歎太史公曰
高山仰止景行行止卽未能至心竊嚮往之於是作

悲製五仰詩焉

我所仰兮在華山側身西望阻秦關蓮嶺阻修徒離歎仙
人贈我白瓊丹翳三秀兮吟葛覃我欲從之途路艱西望
咸陽涕潺湲

其二

我所仰兮在衡山側身南望阻荆關祝融峒嶠心悲酸仙
人贈我赤瓊丹婆娑桂樹山之間我欲從之途路艱南望
洞庭涕潺湲

其三

我所仰兮在泰山側身東望阻齊關南有龜蒙東肅然仙人贈我綠瓊丹招我東遊扶桑間我欲從之途路艱東望河濟涕潺湲

其四

我所仰兮在恒山側身北望阻燕關飛石岑巉不可攀仙人贈我黑瓊丹帶星辰兮佩鳴環我欲從之途路艱北望雁門涕潺湲

其五

我所仰兮在嵩山側身遙望阻韓關企余望之良匪難仙

空同詩集
卷五
人贈我黃玉丹手持金光翳華管我欲從之途路艱遙望
緱城涕潺湲

琳池歌

翩翩黃鵠玉距金衣飛引兩雌來下我池肅我徒駕我舟
折荷花兮權中流女揚歌龍豹馴陽阿雜進齊謳陳會鼓
擊樂未央皇家萬壽民阜康

招商歌

荷爲蓋水爲車女豔豔兮繡帶舒辟陰館坐陽渠招涼風
兮吹玉竽吹玉竽感心志晝卷夜舒蕩人思榮景沉凝霜
零仰首太息沾我纓

順東西門行

嘅人生七十稀來日苦奔去難追賢子孫富家資耳聰眼
明心寡悲酒既清殺核時首春禽鳴梅滿枝人道成世運
熙乃今不樂當待誰召同姓請鄉耆鼓瑟飲醇祝期頤

妾薄命

蘭房宵宴燭舒明今者不樂歲其征豈伊異人惟友生金
杯玉盤殺雜呈恃客驕愛各極情任心屬懽密意傾美人
顧予獨目成烏履雜蹂香澤傳額瞬目語中意宣王稱千
壽客萬年攬衣起舞體仙仙燕翻雪廻臻極妍羅綿縠潤
汗沾顏履遺珮絕立未安滿堂稱能燈屢前金爵弱腕未

勝持相擎袖遮情語微促尊前席影齊移繡裾珠玑光透
迤耳後懸瑱何纍纍皎若芙蓉出綠池贈我彤管親所將
車疑馬停仍罄觴德音愛深結肝腸醉沉獨言猶不忘歸
室自解鳴玉鐙九華流蘇雞舌香合眼宛在君之旁覺來
微月鑒空牀起視北斗長闌干踟躕露晞日上山義成愛
施良獨難悲思歎息淚汎瀾佳人絕代惜玉顏情會恩離
摧我肝願託錦衾終此歡

苦哉行

從軍北到長城長城草枯窟不平十月風發霜霰零人鬚
馬尾冰結成東歸太行踐羊腸斫冰煮糜巖谷旁攀枝掩

淚瞻故鄉紅顏搗素怨夜長悲離恨阻斷肝腸破鏡何時
飛上蒼

嗟哉行

人言高樹多風羣鳥巢其顛勁幹從來易折弱者永其年
蘭茝雖異眾草秋至同一零君子不愛其身身屈名乃成
朱榴雖擅名不與眾草爭春陽炎天眾草死朱榴吐豔何
揚揚縛辦攢葩不結實可憐此物終拋擲

行路難

錦笙翠蛾心莫疑色銷言忤情遽離偶投響諾山嶽移背

面詆訾孰復知川塗憂風備其舟彼風東西流波翻浪側
時不休泊船倚岸纜樹根彼何者鳥翻然喧願置此曲令
心煩

白紵詞三首

鐙繁月明夜何長華袿鳳髻曳鳴璫裊雲流影歸洞房引
商刻徵斷人腸金鞭驅馬立徬徨解衣酣酒歌未央夜闌
雞鳴不下堂

其二

天河爲橋一水長雙星怨夜遙相望玉簾金箔衢路旁塵
暗鐙殘芬秀揚轉眸明月低西方墮靨流鈿飄碎光馬停

車駐空斷腸

其三

五更月微含素波飛霧英英沒絳河桂宮蘭室棲玉娥外
極金鼇萬象羅萬人齊和一人歌生丁福運民太和竟日
為歡豈足多

古調歌

河之水歌

河之水歌李子為其子作也以子追不及

河之水流濺濺望父不見立河干

河水流澆舟子搖櫓東方漸明我不得渡

空同言集
想像歌

李子北行日夜行思其兄其兄亦日夜行於是作想

像之歌

霧邪煙邪行草莽者兄邪

雞鳴歌

雞鳴歌者李子去江西而作者也孤舟泝江漢而上
東方白兮雞鳴膠膠鼓予權兮沙之坳明星上船桅北斗
入地離離蘆中人逝而逝而

內教場歌

內教場歌者李子紀時事而作者也 帝自將練兵

於 內庭

雕弓豹韃騎白馬大明門前馬不下徑入內伐鼓大同邪

宣府邪將軍者許邪

解一武臣不習威奈彼四夷西內樹旗

皇介夜馳鳴砲烈火嗟嗟辛苦

解二

叫天歌

叫天歌者撫民之所作也余聞而悲焉撮其詞而比

之音

彎弓兮帶刀彼誰者子逍遙牽我妻放火我言官府怒我

解一彼逍遙者誰子出門殺人騎馬城市汝何人誰教汝騎

馬解二持刃來持刃來彼殺我父兄我今遇之必殺此儉彼

答言奉黃榜招安嗟嗟奈何奈何三彼不有官饑官賑之

出有馬騎我有租有徭有役苦楚胡不彼而四

招安歌

鷹饑則附我父順子逆子右父左彼則萬只誰曰千只彼
烹牛美妻尙望樵山而秉犁

賊逃歌

戈戟團團鳥飛不過汝安逃兮毒弩蛇矛乎林之坳兮君
不見青衣來狼兵開

愍災歌

火之發兮城南暮飛城入兮勢衝礮急風逆不反我心惶

兮怫兮汨兮安得術
噤爾滅兮解省之火自門
徂堂燒兩

廊兮彼何樓者裂棟
爆瓦天為赭兮煙噴
噴海湧照四野

兮嗟何鳥聲怪而赤
焰翔而不下兮解

愍燠歌

東湖為陸而我無車
有舟灘高水淺行不
得以舒倉浪天

疾威我人七月不雨
田龜圻山而鱗鱗夫
兮出殺賊婦哭

于廬疇給我食

姚源歌

嗟萃萃是何峯攢兮
下則無底之壑血澑
澑潺兮猛獸食

人岑岑禽鳥竦峙鴟
鳶不可以為鳳枉爾
飼兮我聞不敢

以言舉火來白刃帳下離哉翻縣官走前奪驢後叫狗

欵乃歌欵乃歌

五更風打頭來兮嗟嗟欵乃船開努力齊兮欵乃力把柁

立兮欵乃弩力上灘水平平緩兮欵乃北風雨雪吹我寒

兮欵乃日漸漸冥兮誰濟此川欵乃

和方山子歌東賦

餞者在郊黃鳥交交楊柳蔭車有酒有肴

右僕夫歌

何柳不黃何鳥不鳴匪無良朋懷我故鄉

右答歌

春水渙渙水鳥鳴喚追汝者誰白馬在岸

右舟子歌

食君琅玕佩君玉環春蒲再芽北舟我還

右答歌

已哉辭

由衷醜貪孰之廉兮餐水茹蘗乃疇苦汝節威武不屈以
身殉國此戾此賊彼毅彼力曰伊逮之逮之膺矣已哉天
乎命乎訕予改之吾曷懲矣栗滴瀝望首陽之清泉兮有
二人者從之汨乎終予年

三原王公壽辭

軒冕兮巍峩公之進兮羣龍委蛇公今何所兮南山岩峩
誰與公兮逍遙 南山何有兮其雲油油出覆四海兮歸
抱一丘公朝攀兮暮與遊徜徉宇內兮復安求 綠桂兮
丹阿公遊兮酒歌幅巾兮鷺羽婆娑兮公舞壽且康兮慰
我民望兮

招隱山辭

山之桂青青秋風綠葉冬不零王孫幾時歸山空蕙草摧
山之草萋萋春風花發桃源迷子規嘯竹陰日暮愁人
心 秋之夕螢飛山風霜露沾人衣洞門翳寒蘿奈茲華
髮何

空同詩集卷之五終

五言古

贈劉勳

贈劉勳二首

七言詩

贈劉勳之句列後人乃作

贈劉勳

贈劉勳

贈劉勳

空同詩集卷之五終

軒冕兮擬我公之進兮羣龍委蛇公今何所兮南山對
 誰與公兮追述 南山何有兮其雲油油出覆四海兮
 抱一丘公胡然兮暮與遊倘得宰由兮復安求錦綵
 州陶公遂兮酒歌怡巾兮驚羽婆娑兮公氣也且息兮
 後民望兮
 風綠葉冬不零五石餘
 花發桃源迷規陽竹
 人衣洞門影

空同詩集卷之六

明北郡李夢陽撰

五言古

命篇

時命篇

述憤一十七首

發京師二首

離憤五首

七哀詩

與客問答二首

赴江西之命初發大梁作

轅駒歎

李廣

豫讓

怨歌行

葑菲歎

有夢

馳景篇

時序篇

歲晏行

苦熱篇二首

值雪詠懷

苦寒行

行省樹下

卧疾二首

右次感述四十五首

五言古

感述

時命篇

代馬不戀越荆禽豈巢燕鸚鵡渡汝水君子憂未然奈何
客游子率爾辭故山行獸顧丘林出雲有歸還交交聲利

途軒車日駢闐誰念牛下人悲歌夜中歎豪門有棄襦我
衣恒不完張儀懼諸侯泄柳乃閉關貧賤豈盡愚時命當
自安

述憤

弘治乙丑年四月坐劾壽甯侯逮詔獄心
天門鬱岌巖虎豹守其隅番番九苞禽頡頏舞雲衢銜書
奏至尊青龍與之俱光夕絕還響徙倚空愁余

其二

帝居杳何許蒼蒼隔九闈白玉爲阿閣黃金爲重門可望
不可扣仰見飛雲奔何當發炎旭下照孤葵根

其三 其三 其三 其三 其三 其三 其三 其三 其三 其三

鞞響久不作烈士常苦辛魏裾已寂寞漢檻空嶙峋
向千載名名懷斯臣皇心苟識察百死甯一身

其四 其四 其四 其四 其四 其四 其四 其四 其四 其四

懸居曜回景夕風起喬林撫茲散沉憂浩蕩開重陰廻翔
瞻闕門躊躇思玉音宵坐焰明燭懷古傷我心

其五

大化罔不虧人生固多艱汎觀疇昔人浩然發憂歎自非
餐霞侶伊誰駐朱顏律律南山岑拂衣會當還

其六 其六 其六 其六 其六 其六 其六 其六 其六 其六

孟夏草木長垂雲一何淒零雨宵始歇西山朝復躋兀然
坐高春時聞鶉鳩啼逢辰寡宿懽履逆傷前迷旣無杯中
物何以寫我悽

其七

飄風自南來颯颯入我懷我欲隨之翔北向三重階守闈
遙望余閭闔何由排戚戚勿重陳危言多厲階

其八

夕雲鬱崢嶸頽陽入西丘返景漏林端明我屋上樓靜久
得玄理源澄復何求永懷鄒陽子聊以抒我憂

其九

空同詩集 卷六 三
苔井肅陰森嶽廟闕以清車前當路翻紅葵夾階生羈人
散煩疴紆徐步中楹時禽變好音庭柯敷夕榮詎知沮洳
場曠然獲悠情

其十

青青廟中槐交交一雙禽爲巢育其兒結構良苦辛一朝
驚彈羅移棲向高林我行適見之歎息空彌襟

其十一

湫宇夕陰陰寒燈焰不長氣棲遞微明飄忽如清霜人云
網恢恢我胡寓茲房墉鼠語床下蝙蝠穿空梁驚風振南
牖徂夜倏已央於邑不成寐展轉情內傷

其十一
小草生枯桑芊芊競芳辰雖云殊本根寄託各有因自我
罹幽囚忽焉經浹旬我兄千里餘渺渺長河津妻子日望
余蒼蒼隔西鄰所幸二三友笑言越昏晨宵鐙促燕膝昵
語忘苦辛患難苟相得毋論骨肉親面各含酸

其十三

檐月何徘徊晨風復依依載言別同居倉皇倒裳衣處者
各惆悵去者從此辭挽手刺刺語寄言家中知丁甯故與
親願勿長相思明明昊天威我久甯在茲

其十四

皇矣彼上帝赫赫敷明威四序舒以慘中有玄妙機燭龍
躍天門一朝景光回昔為霜下草今為日中葵稽首沐罔
極欲報難為詞

其十五

明月出東方徒行反家室室人走相訊問我何由出明知
非夢寐欲辯仍自失喜極雙涕零轉面各銜恤垂鐙照緗
卷浮埃滿朱瑟愁言卒未傾忽復見晨日

其十六

鳴鑣踰廣陌執簡謁彤闈道逢相識問倏如遠行歸虎拜
闕門下龍顏霽晨輝二后邈以迢吾皇嗣其徽從諫如轉

九旁求炳先幾令聞洽四國壽與南山齊

其十七

臣本草野士弱冠承恩私黽勉簪紱間低回赧容姿直湍
寡回波勁木無弱枝天運不易測物情諒如斯修塗方浩
浩駕言赴前期

發京師

正德二年春二月與職方王子同放歸田里

驅車彰義門遙望郭西樹冠蓋耀青雲車馬夾廣路威風
何赫奕各蒙五侯顧回麟動地起白日倏已暮棄擲委蔓
草榮華若朝露良無金石交人生豈常故絺綌足禦冬誰

念統與素愜彼白華篇氣結不能愬

其二

蔦蘿附松栢枝葉固相因行子戀儔匹况遇同鄉親北風
起河梁日暮多飛塵攜手同車歸駕言西適秦道遠長渴
饑客子懷苦辛仰瞻天漢流夜永不得晨駘馬媚其曹鳴
鴈各求羣明星出東方照見車下人夙興卽往道登彼高
路津還顧望京邑愴焉何所陳

離憤

正德戊辰年五月閩瑾知劾章出我手矯旨詣獄

采采河邊蘭鯉魚何盤盤念我同胞人訣絕摧心肝事變

在須與浮雲逝無端臨發路踟躕誰敢前爲言原鶴抗高聲我行何時還十步九回頭淚下如流泉

其二

練練晨明月鬱鬱風中柳蒼茫遮我車識是平生友感君故意勤贈我雙瓊玖虎狼夾衡輓狐狸草間走東方漸發白聊歸勿爲久天威煽方處君子豈其口

其三

北風號外野五月知天寒海水晝夜翻南山石爛爛丈夫輕赴死婦女多憂患中言吐不易拊膺但長歎永夜步中庭北斗何闕干裂我紅羅裙爲君備晨餐車動不可留仁

立淚洸瀾願爲雲中翼阻絕傷肺肝

其四

驅車重行行前上西山陲白日忽已冥歸鳥來何遲飄風
吹征衣北逝方自茲行路見我行不行爲嗟咨苦稱途路
澁君子莫何之欲訴難竟陳天命自有期

其五

結髮事君子締結固不解青蠅玷白璧馨香逐時改恩阻
愛不周棄擲良在此紅塵何冥冥白日淪西海對面有訣
絕何況萬餘里得寵各自媚誰爲展情理訛言方蝟與君
子慎其始

七哀詩

問客何方來四月發回中繁霜隕百草樹木如寒冬客行
一何遙客顏一何憔悴舉目望關山關山鬱蕭條少壯盡乘
邊崖谷何寥寥戰馬不解鞍弓矢常在腰碩鼠走空倉城
上狐狸跳咄咄勿復陳更問北來人六月天雨霜哀哉生
不辰

與客問答

門有萬里客顏面帶風霜左右佩雙鞬意氣何揚揚問客
何州士逝將之何方客亦不顧云但言開中堂手持一書
札口口稱故鄉長跪受書札草字八九行上言親戚故下

言別離傷

其二

長跪牽客裾故鄉今何如
客起長跪言故鄉不可居
墳壠既蕪沒甯復識田廬
鄰巷鮮故人族屬半丘墟
巖巖高山谷今爲官路衢
主人聆客言涕泗交漣如
離鄉三十載小女爲人姑
邇者日以親遠者日以踈
狐狸知故穴牛馬知故陸
願爲連理樹託根北山隅

赴江西之命初發大梁作

戚戚辭故里盛陽遠行遊
入門揖兄嫂征馬已駕輶
日午登前岡浮雲逝南流
零汗透衣巾僕夫行悠悠
軀微懼命

重慷慨但懷愁還望故所居匹鳥鳴相求而我獨何爲道
路常懷憂

轅駒歎

世徑互險夷富貴安所需昔爲櫪中駿今爲轅下駒白日
仰悲鳴青雲立踟躕未蒙主人顧何由効馳驅朝思碣石
津夕睇流沙隅常恐侶凡蹇棄捐中路衢

李廣

李廣昔未遇射獵誰見稱君王猶未識他人甯不輕日從
田間飲夜止灞上亭醉尉前呼呵小吏亦見凌一朝剖郡
符飛蓋赴北平凭軾覽百邑樹羽甯干城亭障不設燧櫪

空同言集
卷六
馬躍頓纓彎弓射虎歸
淡淡黃雲生自從結髮戰
舍鏑無虛鳴威情五單于
胡人寤寐驚孰知身運乖
數奇竟無成壯顏逐年衰
白髮忽見嬰寄言雄圖者
俟命莫吞聲

豫讓

士有氣相感殺身酬所知
伯氏既謝世族姓無子遺
噬炭甘若飴漆身亮何爲
生既荷君遇沒敢求君知
仇聞再三歎攬淚惠新衣
玉劔四五動左右神爲摧
愴哉彼流水迄今爲鳴悲
行路仁歎息芝蘭繞墳基
人生固有畢節義誠難虧

怨歌行

怨違情有悲懽聚理無欺懽怨非中則感離難重持纔見
春華交倏已晨露滋秋風吹羅袂團扇不復施團扇與羅
袂用舍各有時炎寒啟迭運超曠多遠期勿徒歎捐棄恩
愛倘中移

葑菲歎

菁菁田中葑與與疆上菲託根豈誠異敷葉爲誰美采掇
女心歎遵路勞情理鮮莖入素手終朝不盈筐置之獨長
惋拭淚沾衣裏白華肇卑薄谷風啟怨誹色衰使交離棄
美因下體空瞻寸晷旋倏見巖齟起徒持履霜戒誰念禦
冬旨吟歎非貞喻託物聊在此

有夢

瀟迹古梁郊託茲洪河疆流景逝不處衆草忽已霜玄雲
駭崇原鳴風激空桑侯子竟此夕念獨涕沾裳人欲天必
從神交詎無方解襟卽幽寐執袂奉顏光道暎未終已舒
體各異鄉鳴雞在東壁薄月鑒空牀精誠諒有合暫違甯
詎傷

馳景篇

小至方浹辰居然屆寒臘澄空暮霜斂雲物恣吐納眷念
河關阻悵望三川楫城陰多悲風馳景杳難接遙憶鹿門
駕緬軫馮驩鋏

時序篇

惠青編感烈壯壯賦

邈矣時序邁悠悠羈思慙少歲覲飛龍振步躡雲煙揚芬
凌紫霄結駟覽黃淵王綱祇以穆四海屢豐年晨趨謁雲
陛晚沐踏京塵流觴擁華館藻翰飛陽春逸者眷多暇壯
士耻無聞徒閱芳華改何有尺寸勳日月不我待倏忽星
暉移抱疴屆茲夕憮然傷夙期玄髮難久恃毋令達者嗤
歲晏行

歲晏幽陰積寒霖夕館空浮雲起城闕浩眇安可窮悠揚
橫太虛回薄蔽鴻蒙我有一叢蘭種之良亦難飄風忽來
吹零露苦相殘勸君留此草蕭艾不可寶

知零霜苦熱篇

大運互伸縮二儀每騎蹇陽威苟不烈陰馭何能反避暑
躡清榭拭汗望幽巘密綠暎豐林萋蕪萎脩坂逃飲豈其
性對食不能飯嗟彼馳騁子晨暮各忘返執熱古有經愚
智詎相遠何當蘇海宇余亦遂仰偃

士却無其二

伏陰會當升愆陽固有期墻茨覆鮮實蟪蛄夕以哀所虞
大火流卽值涼霜催軒轅製六律大舜彈鳴絲四氣爲之
和民生寡憂思古理日云邈季運安所師我懷良已永炎
曜况倭遲願言惠清飈颯然均此施

值雪詠懷

索居倦晨暮沓沓傷歲窮玄雲爲誰屯流霏夜常風映隙
既窈窕穿窗亦玲瓏凌高似有綴填卑忽若崇哀多雖稱
物益寡竟誰功匪無盈尊酒斟酌解我忡途路悵伊阻佳
期杳莫同握瑾惜楚老投瑤怨國風人欲天必從精感理
能通鍾絃曠易絕郢調寡彌工持爲知音說庶以折其衷

苦寒行

白日斂光曜北風如劒刃澤堅走鳴車冰雪峙千仞登高
望四海四海水將結蛟蛇壅巢窟虎豹潛於穴巘岈太行
谷蒼莽陰山戎沙磧晝飛霜壘門吹烈風烏雀墮巖壁黃

孤肅空城居人掩關卧客子無復行

行省樹下

中林溽雨積蕪徑暑日薄眾鳥集于樾鷓風眇焉託披雲
矚岑觀縹緲三阿閣踽踽懷昔賢擾擾疾勞錯夷猶攀榮
柯慷慨念幽壑

卧疾

寒飈振䟽牖十日歲華改王孫怨脩路芳草若相待寸心
百慮嬰移疾屢朝晦范甑蛛網生翟門雀羅在歎息中林
蕙望望何能采

眠痾感歲晏中意長刺刺展策不能讀對酒寡懽懽晨風
激幽林堅冰滿川澤短景不可駐倏忽變昕夕飛雲迅南
征歸鳥厲其翼地北常苦寒寤寐想溫域

孤蓬空城居人稀
獨客子無復行

行省樹下

平林薄雨宿燕歸
五月薄寒鳥集下
橫鵝風影掃泥雲

鳴谷觀經劫三阿
公卿滿殿首賢良
長安夢鎮吏猶驚

何賦懷念

臥疾

病疏隔士何歲華
改玉孫忽俗路芳
為春相林

風飄飄其翼此
此常苦寒線寐
懸賦楚羅在歎
息中林

為樹林絕水
滿川鞞跋景不
可搵劍忽變
而之紙雲
及南

空同詩集卷之六終
陳吳策不
論蕭慳
醉寒
斷
鼻風

空同詩集卷之七

明北郡李夢陽撰

五言古

雨後往視田園同田熊二子二首

庄上晚歸車阻於潦渠徒步始達於岸

山夜 蒸熱三子過我東庄

田園雜詩五首 秋詩二首

右次感述一十二首

登東城樓晚下樓作贈同遊數子二首

寄贈端溪子二首 贈蒼谷子

贈青石子三首

贈劉潛

贈崔子

贈孫生

贈王生二首

贈崔生

贈魏子二首

三士篇贈醫李鄭張

寺遊別熊子四首

甲申中秋寄陽明子

贈李世德

寄贈玉溪子

初秋上方寺別程生

贈鄭生三首

寄程生

贈梅國子

贈定齋子

空同詩集 右次贈寄三十一首

五言古二

感述

雨後往視田園同田熊二子

鳥性悅儔匹人情豈無慕
亟見不云數獨行必相呼

去聲昨

有城上眺今復郭南步
膏雨回原綠豐林宿殘霧
久蕪慨我廬旱水兩妨誤
夏禾既岑漠秋秫庶能穫
釀具粗已足念子有長路

其二

雨嘆自有期歲功詎云差
昨來偶滂沱萬物皆顏華
晴晨子見過毅然巾我車
荒徑蹄轍稀澤國疎桑麻
長風起修

林夕響連蒹葭
芄芄南山豆
離離東陵瓜
懷古看行雲
矯首徒咨嗟

庄上晚歸車
阻于潦渠
徒步始達於岸

暮醉各言歸
風起草獵獵
潢潦溢中軌
車至不可涉
野黑徑復曲
魚貫踵相躡
良懼蒼耳窟
重爲蜥蜴怯
童稚行我先
溝塍負而躡
世路本夷嶮
人情有驚帖
閒素輕波濤
臨川想維楫
履坦合自咎
長吟詠匏葉

山夜

孤月上東岫
白鶴激秋唳
涼風振溪壑
林影颯搖曳
山居本深靜
夜氣復澄霽
冥心向千古
眇焉託真契

蒸熱三子過我東庄

林蝸午不歇日毒土色赤鬱言森密裡時華媚深碧三人
者胡來無乃不速客黃公蒼鬚髯二生鄭生作程生誥頎而哲入
蔭齊解帶對酒各岸幘籬萱挺其秀檻果垂易摘無言豈
爲默有形忘所役杯乾時一斟遽復至西夕

田園雜詩

朝陽曖秋木凝露未卽晞翩翩啄榴鷺自驚集復飛眾穡
旣登載我事亦漸稀晨興坐東牖兀然對紅薇噉噉一白
鶴北逝將疇依忍茲稻梁辰而汝甘長饑

其二

大車行棘棘小車響額仄隨分各有營急者稼與穡旦出
在田野日入未遑息長陰下西夕蕭颯起寒色雲霞變彩
氣照我桑麻國立看勞者歸露濡徑不濕

其三

野清雲氣滿場功亦云畢收穫雖有殊大小各盈室感茲
狼戾年追念憂苦日紛然噲其饑妻子孰遑佚歲工借寒
熱人事坐勞逸蕭蕭原野霜何草不垂實

其四

壯時掉塵鞅老乃即農務值茲田事終怛然感霜露原萋
日以斂林華不守故嚴霜淨游氣翔鵠在天路鷓雀躍蓬

蒿啄食不滿嗉而予竟何言飯牛髮全素

其五

田居亦安娛患者寡朋仇農談或時歇仰視蒼雲流青衿
者誰子道言卽我謀開尊面圍場剝棗充盤羞物小意固
勤鷓旣情仍留晶晶遠天色秋暘下林丘

秋詩

百卉淒以腓游行散我矚夕風一何瑟入園乃華馥菊也
紛其英修篁積寒綠人生匪金鐵榮落譬草木磬折者誰
子誓死日爭逐賢貴與賤愚滅去孰還復烏雀各有安無
爲智者辱

爲督者其二

北風胡鴈急小禽亦南飛
輕俠羣少年求伺爭有爲
弋彈無遺木畢施在中達百發不一獲
用心良足嗤黃雀墮計中鳴
吽如得依白鵠舉雲漢覽之心
內悲小大有分量瑣瑣豈知微

贈寄一

登東城樓晚下樓作贈同遊數子

登樓散涼目隕然日云暮
逃暑良已厭戀景復延顧曠野
起暝色層闔合昏霧眷言樓中客
共此城上步蚊蟲撲面游蝙蝠時
自度二儀但莽莽一氣黯廻互晝夜
本定理明

晦非難悟日入各言息鐘鳴復馳鶩齒岸宋帝閣突兀信
陵墓往似宿沙禽來如綴花露徙倚千仞梯長謠發悲慄

其二

盛陽麗樓臺爛如錦繡錯日入暝煙起俯視但冥漠卽此
悟人理天道固可度動靜啟晦明代謝有今昨涼飈逐夕
興迴聲滿虛閣四顧水明滅宿鳥喧相索啞啞啼城烏噉
噉上雲鶴忉怛感晨暮徙倚罷觴酌北斗忽復低西月隱
長薄閃爍海光動翕沓氛霧廓無恃黑頭在早定滄洲約

寄贈端溪子

歎鳳世已遠悲麟竟何爲蘭蕙秘幽巖蕭艾盈路岐君子

抱明德傷也誰復知隨流非我心特立乃見疑亭亭南山
松匪無霜霰摧寒甃但不改孤貞常自持

其二

智者尙高契達人慕希聲曠世有相感同時悵難弁烈風
起玄朔百卉忽以零登高望所思慨焉念徂征鴻鴈序翅
飛麋鹿呦呦鳴爲言明馨子盍簪終有成

贈蒼谷子

玄雲翳白日積陰何漫漫風氣日以淒泥雨常不乾漂籜
委川塗百卉良可歎覽物懷伊人撫時悲涼寒憂來如亂
絲理之夢無端爲霜念逝鵠多露怨芳蘭所嗟聲影隔匪

懼馨香殘徒把瑤華音長謠望林巒

贈青石子

高鳥有違羣離獸多悲音懿彼婉孌子悵焉分此襟朝發
南河隅夕暮乃北岑玄雲旣無極黃波浩且深君其四海
翔無言還舊林

其二

季秋凋羣木寒潦濫中軌笳鼓濟方舟軒車匝河渙攀德
惜遙邁悵分睇馳晷采蘭徒情結把菊爲誰美願子厚衣
襦霜露自茲始

贈劉潛

人生無常因飄如風中雲昔別大江隅今也長江濱涼颯
起霜夕隕葉何紛紛我菊有佳色毅然獨芳芬遲速良有
時勉哉樹高勳

贈崔子

鯤魚游北溟鳳鳥翔南涯扶搖非無運鳴世自有期顯夫
競鐘鼎遁士潛蒿藜駟馬豈不榮泉石安且怡悠悠西山
人匪為薇蕨饑寄言青雲客策勳及今茲

贈孫生

古人種桃李不為蹇其花君子振英芬豈在文與華炎陽
赫晴彩百卉流丹霞蕞彼東園實纍纍一何嘉采者自成

蹊舉世徒咨嗟

業業早回北向輝晝日望三楚

贈王生

鳳鳥世希有衆人常見疑一朝下西周憂焉鳴高岐光彩
照四極觀者驚以咨神物恥自衒卑鄙甘見欺驥馬匪伯
樂鹽車空號悲燁燁豐城劍非華誰固知

其二

伯牙違鐘期有琴不復彈茲意奚以取良爲知音難得失
有榮枯合離成怨懽黃鵠戾天雲玄鴻漸河干淺夫貴多
矜狹士賤自殘幸子固明志顯塞察所安

贈崔生

伊昔振我衣連步千仞岡巖谷窈疑阻岐徑回羊腸與者
咸莫從子也乃同行舉首撼天樞縱目攬大洋星斗何厯
厯海波浩茫茫登山貴及顛涉水非無航願言窮高深念
哉毋相忘

贈魏子

霖潦久廼歇晨興送還輶野寒泥淖盛念茲途路修人生
苟相許豈必曾綢繆踟躕東路岐贈子雙吳鉤

其二

八月浙潮滿念子鼓南楫海月團會峯山峯下江葉里閭
多宴娛仕宦有榮業早回北向轅晝日望三接

三士篇贈醫李鄭張

嚴麟厲時威稿葉下榮木春風一以敷病草奄回綠天道
豈常肅人事有還復七情既吾賊六淫乃爲殞農經發玄
旨軒問擴英馥代殊理易昧行乖計相逐陳荑抱綿息寒
根蘊眞育李生起專門鄭子振空谷張也剖金匱奏効更
神速飲橘祗自銜種杏亦可惡誦我三士篇聊以助清穆

惜翰以寺遊別熊子

天地固常爾遇之情不同但看搖夏樹何似飛秋蓬古來
怨離人豈必窮與通默默兩無語坐披琳殿風

其二

夕風起涼閣入耳松撼撼當此佳勝區誰忍遽離析簷鶴
憂憂鳴蘿翠滿衣席異時冠蓋場倘憶幽賞跡

散眸七寶地觴爾孤雲臺一望碧煙合四面清風來流影
盪我前炎樹生秋哀一笑問天地劫灰安在哉

蘇其四

獨立臺上閣仰茲城下湖爲問黃金魚徑尺今有無愚者
人盡笑賢之乃謗誣二者吾適從不如乘海桴

甲申中秋寄陽明子

風林秋色靜獨坐上清月眷茲千里共眇焉望吳越窈窕

陽明洞律兀芙蓉闕可望不可卽江濤滾山雪

贈李世德

豢畜不生麟鸞穴無鷓鴣求水貴求源佳木無惡條李門
世清修三輩燁雄超黃扉早殺翮中葉乃淪凋生也困逾
勵奮飛竟雲霄大鈞幹神化萬物隨生消英英畹中蕙化
爲艾與蕭願堅謀始心全我金石要

寄贈玉溪子

松蕙不棲蟬熊皮不上蟻秉性死不易斯足驗人理苟投
信若飴義交固如水如水遐則思若飴背乃毀悠悠徂暑
月眷眷念君子霍雲停復飛汾水蕩而駛山西廻夕陽皎

如覲光美徒操孤絕絃歎息竟何以

詩卷八 初秋上方寺別程生

勝地亮常爾佳士難屢并未窮結駟游遽復揚帆行古林

鬱城隅石門敞幽清趁風選濃蔭布席觴羣英竹涼時自

來殘暑驕未平戒飲今三暮為子杯一傾義投不在故跡

遠心自縈念茲徘徊意時哉樹嘉名

贈鄭生

杪秋木葉脫霜露告成歲驅車遡寒郊觸物念征邁戒舟

有程日維駒阻心愛所幸旦暮留前途或風瀨

其二

伊予解組歸汝也美少年駿馬臂兩弓射獵梁王川感子
重意氣授之黃金鞭萬里不易致悲鳴爲誰前
英英百尋木時至乃黃落楚楚清俊郎還家鬢蕭索桂樹
寒正榮溪魚白而躍山行采瑤草寄我長生藥

寄程生

河日淡莽莽飄風但塵沙陰陽爲誰爭時至枯亦葩念離
傷歲窮懷音怨途賒彼美杏何許孤吟弄瑤華夜攬海門
月晨吸波上霞苦心誰固知延望長自嗟浦鴈回故翼汀
蘭茁新芽無負汴上約梁園多奇花

贈梅國子

烈士有心許佳人重情歡投義既不易識者良獨難清秋
理瑤瑟爲君發高彈一曲未云亂仰視孤鴻翻一舉狹干
里再舉青雲端我欲從之逝羽短才力單聲影中藏之儻
接排風翰

贈定齋子

水澄萬形一鏡明別醜好哲人靜以俟愚者苦紛擾君本
觀海人揚旆向東道高步登岱巔橫覽盡洲島匪云波水
浩祇見衆山小孔林秋颯入漂簪委寒草明禮展躬謁燕
翳爲涓掃

同前集卷之七終

五言古

衛上別王守二首

贈王舍人昇二首

贈劉武古首

贈劉武古首

贈劉武古首

贈物國子

烈士有心許世人
 重情敢拔義
 既不易識者
 良獨難
 埋珠豈為君
 發高
 曲未云亂
 但願
 聖再
 接掛風

水澄萬形一
 鏡明別
 觀海人
 涉細向
 東道高
 步登
 俗
 橫
 清
 林
 秋
 入
 深
 變

空同詩集卷之七終

空同詩集卷之八

明北郡李夢陽撰

五言古

衛上別王子二首

贈徐禎卿

贈王舍人昇二首

又贈王舍人四首

贈劉氏五首

贈徐陸二子

申州贈何子

寄康脩撰海二首

贈王生滇南

送姪木北上

送秦氏

送谷氏

別李氏二首

贈甯氏二首

空同詩集
送閔氏

一首

長歌行贈房氏二首

憶昔行別閔侃

贈沈氏二首

送蔡帥備真州三首

京師元夕有懷丘子兼憶舊遊而作

元夕友人見訪

月夜飲別徐氏

送鄭澹

贈李僉事衢

將赴江西寄別殷伊陽明府

正 鳶山訪汪氏因贈

冬日撫州贈友

右次贈寄四十三首

五言古三

贈寄

衛上別王子

晨風應候至雞鳴各巖車我今游宋中子當旋舊閭僕夫
理前綬轅馬悲鳴趨一別阻秦周相望萬里餘首春霜露
重厚汝征衣襦昔爲同袍士今在天一隅故者日以遠疇
能察區區

其二

稅車朝歌里送子輝水陽羣鴈起高飛凌風各分翔敦交
多故懷况乃憂故鄉征夫愁短日去馬知路長童童孤生
柏結根南山旁願言采此柏遺我心所當良無白鵠翼何

以得高顏山峯颯言采北林戲姓心視當夏燕白戲莫何

之姑對贈徐禎卿灑益夫慈賦得去無取器其童童既主

獨處忽不憚攬衣循東廂樹木何修修春風起飄揚我友

駕在門告言適江湘倉皇挈玉壺追送臨河陽顧瞻兩飛

鳧並戲水中央翩翩厲羽翮鳴聲一何長奈何游客子一

別永相望時澤亮有周天命固其當薄終義所劣別離庸

詎傷懿彼回路贈慷慨申此章思賦望萬里錦首春露露

具風飄贈王舍人昇氣車姓今秋宋中子當致書問對夫

迅風激高雲朝日照嘉林良友忽遠適惻愴摧我心川原

望靡極江路浩且深殊域寡親戚孤子故難任荼蓼積愈

苦淚下不可禁

其二

攬淚瞻林木
韡韡敷華葉
層闈帶廣陌
車馬暮相接
駢裾侈高會
誰念獨守妾
豈不思方舟
川廣不可涉
葑菲遺下體
舉世重紅頰
勸子且甯志
爲恩孰周浹

又贈王舍人

送美城東陌
還車望上陽
觀闕百餘尺
蓉城鬱相望
同在天一隅
子今旋舊疆
經子故所居
我馬立徬徨

其二

徬徨亦何爲
悵望遠行客
枯桑號天風
時節倏復易
簪紱

匪我榮棄置安所惜願為東南風遂附高翔翮

其三

勁翮無羣棲靈根豈叢蒨人生非苦匏安得常相見動息

各有因况乃異鄉縣徘徊岐路側仰視雲中鴈

其四

鴈征會來歸君行何日返驚風飄馳光歲月忽已晚登山

采白苓遺我心繾綣上言制頽齡下言助餐飯

贈劉氏

晳晳吳中娥奕奕宛清揚邂逅此堂隅瞻顧兩回翔攘袖

發皓齒列坐無高倡行雲為徘徊順風託馨香周席莫不

歎側目生流光何意芳盛年峻義明秋霜於禮誠銷薄銀
漢徒相望

其二

矯矯雲中鵠忽忽晨南翔連翩客游子駕言逝何方霜露
日夜零東路悠且長意欲從子逝我馬立以黃徒思諒無
益欲置難遽忘愛子千金軀雙親在高堂

其三

埋輪國東門駕舟越洪洋晨發天北隅日夕至建康皇居
槩太清陵樹何蒼蒼白馬服衡軛飄颻過路旁敦交豈獨
薄貧賤多顧藏所志在甯親榮耀乃其常

其四

青陽獻嘉歲玄鳥鳴我堂遠子念行役驅車發南疆豈不
 誠辛苦王事切中腸駢駢泝原薄拊劔何慨慷羣形冒休
 澤朽幹場朱芳君子法天造小人曷能臧

盜俗置其五 志愛于千金 願雙賤奔高堂

回車太行谷結轡登羊腸羊腸何崔嵬俯視見大江大江
 日東注游子悲故鄉故鄉復迢遞欲濟河無梁晨起振我
 纓駕言行朔方丈夫貴榮名臨路徒離傷

贈徐陸二子

徐名縉字子容姑蘇人陸卽深也

清晨思行游駕車郭西門凝霜被野陸莽莽多荆榛霖雨

不歸川四顧無行人何意岐路側悵然獲所親晤言不須
與含意俱未申雲間富才傑具區產名珍一爲時所知光
耀在青雲情交苟不劣窮顯非所論感激平生義匪爾誰
當陳

申州贈何子

翩翩雙黃鵠凌風各將去哀鳴岐路側一步一回顧何異
同心子失散在中路別君倏五載我髮忽已素今逢不須
與趨駕一何遽臨分但踟躕道語不及故山川何悠悠白
日奄欲暮努力愛玉體慰我長思慕

寄康修撰海

晨步城西岡遙望終南岑荆棘高蔽天白曜翳以陰雞食
鸞鳳饑蛾眉讒妒深葑菲遺下體一別成飛沈出門眺四
郊莽莽悲風吟海水有可測傷哉誰諒心

其二

少陰盛霜雪崎阻鴻鴈饑荷斧入林谷日暮誰共歸林樹
窈冥冥徑路多虎羆北斗橫塞岑邵野風振悲欲往河無
梁念子忽如迷榮耀在須臾亡沒誰復知思附玄鶴翼從
子以高飛

贈王生滇南

人生如枯蓬團團隨風轉朝猶同一隅夕暮異鄉縣鳳皇

擇林遊奮翼思高飛一飛萬餘里路澀常苦饑岑巒造青天蹊磔何峩嶢食尋竹實餐棲必梧桐枝德音倘不墮慰我心所期

送姪木北上

羣鴉競時食孤鴻獨高翔丈夫四海心誰能安舊疆仗劍辭所親策馬登前岡歲晏霜露繁原野何茫茫草枯禽獸饑潢潦浩以長感吟悲蒹葭試鳴候朝陽勗哉樹名勲念茲西頽光

送秦氏

秦名文字從簡台州人

健足慕千里倦翮常卑安陶子重折腰貢生乃彈冠黃龍

空同詩集
卷八
日南遊長江浩瀾瀾竹實匪不甘鳳孤誰爲歡故廬倚青
松懸嵯激鳴湍返眞謝形役庶以成盤桓

送谷氏

零雨晨微微艾葉何旆旆端居輟中憂駕言送征邁黃河
流湯湯飛雲下燕代臨汀羅腸俎趨景徒傾蓋轅馬望路
鳴僕夫整衣帶孰非金章客子也獨所愛行行樹聲猷及
此明良會

別李氏

逸禽恥淹棲良駟競先步出門有行游諸所豈得顧辭燕
戀舊壘渚鴈企高鶩情離誠有芥心期固其素匪無便儂

子新人不逮故脚蹠野颺夕分手卽前路

其二

前路乃何之迢迢雲夢澤霖雨暮戢戢囑子且停輓隕籜
委川徑潢潦浩以白熒熒雙龍劍佩服我所惜水行蛇蟲
匿陸邁虎兕辟願言奉心懽庶與備朝夕

贈寧氏

野菽萎平眇寒露一何早凝霜一以零蘭蕙亦眾草美人
中夜興憂心怒如擣玉石誠靡別妍華恃疇保瑟瑟谷中
松見者豈不寶良無匠氏顧歎息歲將老

其二

白日何冥冥送子黃河陽執手無一言仰見雙鴈翔處卑
心罔怕奮飛多中傷撫劍兩脚蹶低頭涕沾裳天運有銷
盈志士懷剛腸去去愛景耀離別固其常

送閔氏

怛怛困暑溽悠悠抱中戚時蟬遯戶響流汗揮復積登高
散我憂忽覩遠行客爲問客者誰是我心所憚律律佇征
雲迢迢逐歸翩孰無室家念忖爾懽聚夕伊余胡寡仇
癸痛離析

長歌行贈房氏

捷步競先鳴達人貴沈幾鴻鵠翅摩天於世常高飛煌煌

冠蓋朝疎也乃獨歸誰云傷秋子而爲鱸魚肥彼哉粉榆
傳豈知千仞輝

其二

瀟瀟夏川廣驚風夕揚波眷言送誠歸軒騎匪中阿倦鳥
故林趨獸離懷前窠君看纍纍實豈復華其柯皓首聲利
途攸見無乃頗

輟馬思憶昔行別閭侃侃長出郭木末
憶昔少年時遨遊咸陽都邂逅塵埃裏相邀入酒鑪半酣
擊劍起挾彈青門隅風蓬離本根奄忽浮雲徂聚散良靡
期晤言誰復圖濛濛零雨辰悠悠梁園途翩翩白馬鳴藹

藹朱華敷昔逢美姿顏今也白頭顱中藏難遽宜相看但
將鬢前路浩崎嶇愛子哀暮軀

謝晉少贈沈氏

辭馬鳴故羣羈人戀心知身也匪木石孰無懷與思藹藹
軒蓋途才捷競先時冥冥歸林翮爰集非無枝龍蛇悟易
訓蟋蟀感唐詩情感辰靡延把袂竟河涯贈子金錯刀申
子古別離德愛誠匪他邁君豈無期

其二

旦日子當發淹留復今宵良乏美盤餐爲君品鳴簫君如
巖下松霜竇顏不消眾草苟移時化爲艾與蕭聆曲復不

憚瞻焉傷迢遙攜手步前庭仰面看招搖巢子潛箕陽四
岳俞唐堯願言脩九苞曳佩鳴天朝

送蔡帥備眞州

晨飈下嚴霜波水白浩浩雞鳴人語動趨駕恨不早出門
望原野四顧但衰草芒碭一何寥驚鴈鳴寒蓼老驥志千
里烈士輕遠道臨事毋謂難爲善豈在小

其二

颶舟逾長淮登陴望大江氣勢何鬱盤皇矣眞我邦宮殿
槩高淸鍾山變青蒼橫飈靜霜夕天塹如沸湯時平智士
拙貨賤良賈藏無言邊境勲甯居亦慨慷

其三

隕霜凋楓林澤藪莽虞虞結徒策青驪行狩聊我娛左發
殪玄兕右捐仆文駮插羽坐草間飲酌炙鮮腴川光夕明
滅鴈驚風叫呼立馬千仞岡仰送浮雲徂彈劔問所私何
如李金吾

京師元夕有懷丘子兼憶舊遊

名都鬱坱壘浮雲蔭孤臺宿昔與丈人攬袂凌崔嵬延眺
殊未已明月從東來俯身覽九陌車馬何諠飛朱門競笙
竽鐘鼓趨行杯詎知前代人寒隧生青苔金珠委瓦礫鉛
華安在哉沈冥日云富感激令心哀丈人方岳裔夙質謝

塵埃婚嫁慕向子幽棲放顏坏七十尙蛇蟄白衣潛草萊
嗟余糾簪紱俛仰阻沿洄逝將親逸躅榮盛等浮灰
非非志元夕友人見訪以棄榮錄龜乎但空林葉于秋榮
春月多麗輝白雪媚其姿美哉京洛夕銀潢鬱逶迤逶迤
帶紫陌車馬驅以馳繁燈張四衢都人競遊嬉道者便靜
性俗夫乏遠資林塘枉冠蓋繾綣非我期金波低宛轉明
星漸離離清光苟不虧永與浮雲辭

月夜飲別徐氏

仲月玄鳥集蚯蚓蟠于廬謁從徐氏飲置酒臨中除明月
一何光眾星爛高虛中有參與商相望憺不舒人生雖有

權詎得常相於夷猶廣庭內惻惻摻予祛哲人重明德邁
士懷離居離居諒復合行矣慎所須

贈鄭澹

路縣家室怨久別誰奈苦荏苒及春孟冰消舟莫阻臨觴
歎河邁指景趁前侶汀曲帆易隱勞心望徒佇

贈李僉事衢

處世寡諧合營道無貞心緬邈伯牙絃歎息誰爲音竊祿
非我志隨風豈能任所以棄朱綬窮年卧空林君子枉榮
顧駟馬一何駸輕蓋蔭白日軒車匝庭陰冥晤及春期列
筵享同襟目快淑氣草耳聆悅時禽行至弗徒歸觴舉恨

不深末路校通塞鑿止無飛沈託意誠匪殊在遠固宜欽
願言附松蘿子其斷堅金

將赴江西寄別殷伊陽明府

引年豈必老求志不在奇曰余逾壯齡遭斥還山棲事與
北門合迹擬東陵齊滅音謝人徒四暑忽逮茲向平果遺
榮謝安終狗時詎意值嘉運未照及葵藜簡書下我廬急
遽誰得辭迢迢江西帆別當首夏期束裝逐流潮改服團
炎颺情鬱爲念故寄重慚余卑虞絃改自調孔鐸湮誰持
江漢誠暫浮匪廬甯久羈返貞意已堅抒懷告心知

鳶山訪汪氏因贈

昨余發弋邑急霰舞鳴湍灘高果莫泝改騎凌層山山層
水復曲歲晏嵐風寒捫蘿冒嶮艱踏冰涉澗沿日入達平
夷倏覲君子關清溪交遠圳高松夾路間遺榮靡所希時
仕義乃詮未羨焚魚高頗欽奇字傳矧伊連枝芬慰我同
心蘭綢繆促宴筇曙猿響南巒

冬日撫州贈友

晨光鬱將布時嚴氣自懷陽也諒匪力厥陰無亦甚時極
理終固情成勢難寢徒然江漢紀莫制北颺凜寒湍落孔
家霜色峻石廩甘菊冬始華赤樹紛如錦校閱纔及旬勞
拙遺安枕既已阻攜玩胡由接芳袵擬峴行共陟寄言備

醕飲

古來詩人
六

余發天世急雲舞鳴濤離島果莫添
 水復前歲是風風寒清蕭日暖凝霜冰涉
 再修護石千關清溪交連州高松夾湖園
 道前乃於末美於公高厚餘壽登輝研伊
 心動瀛海便常甘贈板緣海濤
 冬日掃地
 晨岸翻地
 埋終固
 家
 冬
 不
 後
 分

空同詩集卷之八終